


Malako Ya Gabriele

Epai Na Danyele

 Nkolo ápambola yo, ndeko. Mbote, baninga. Molunge ezali makasi mpo na kozala na tabernacle na ntongo oyo, kasi ezali nkembo mpenza kozala awa. Esengo mingi ete tokoki—tokoki kokóta awa lelo, mpo na liyangani oyo. Mpe napesaki liyebisi ete nakozala na mayekoli moko sikawa, likoló na *Mpóso Ntuku Nsambo Ya Danyele* oyo. Ekangani ná Nsango mosusu oyo etikali liboso nákoka kobanda bi—Bilembo Nsambo. Ezali na Bilembo Nsambo; Malózi Nsambo; Kelelo Nsambo; Mawa Misato; mwasi na kati ya mói; kobwakama ya zaboló motane; nkóto mokámá na ntuku minei na minei oyo batiami elembo; nyonso wana ezali kosalema katikati na ntango oyo. Mpe nakanisaki ete nasengelaki kobanda na oyo liboso.

² Sikawa, molungé ezali. Tokani koulé mingi te, tokosala kaka oyo tokokoka. Mpe oyo ezali eleko, na momesano, eleko ya bopémi, ntango bato bazalaka na losambo mingi mingi te. Mpe, koleka mingi, mpe bango nyonso bazalaka na bisika ya ba-climatiseur, mpe bongo na bongo, bafandaka malamú mpenza. Tolingaki kosepela kozala na yango, kasi na ngonga oyo, tozali na yango te.

³ Mingi na batata na biso ya kala bazalaki kofanda libanda na nse na moi makasi. Ntango nakanisaka kosenga bolimbisi na bato ndenge tozángi esika ya climateur, makanisi na ngai ezóngaka ntango nyonso na Afrika, epai bafandaki wana na nsé ya mbula makasi ya mopepe wana, mpe basi yango ná nsuki na bango kokita na elongi na bango, bazalaki wana butu-moi, batikaki ata moke te esika oyo bafandaki; kolia te, komela te, to eloko moko te, bazalaki kaka wana, mpo na kozua Liloba moko, to mibale, ya Nkolo, mbala na mbala.

⁴ Nakoki kokanisa na ntina na Mexico ntango molungé ezali makasi mpenza, ete na bosolo, nafandaki na esika moko ya climatiseur mpe namekaki komipepa, molunge ezalaki makasi mpenza. Mpe komona bato yango kokóma wana na ngonga ya libwa na ntongo, na esika ya masano monene wana, ná bakiti te mpo na kofanda. Bato na bokono, ná bokono solo, kobundáká na liwa, babéli; cancer, tumeur; ná bamama babéli, bana miké kobunda na liwa, mpe nyonso wana, batelemi wana na nsé na mói makasi mpenza wana, esika ya mpio moko te, mpe bazalaki kosékema bamoko na bamosusu, longwá na ngonga ya libwa na ntongo kino ngonga ya libwa na mpokwa wana, kaka mpo na koyoka miniti ntuku misato na nzela ya molimboli, mpe komona

misala ya Nkolo. Bafandaki wana mpe bazelaki, ná bilamba minene ya bozitó, balataka yango na eleko ya malili makasi mpe ya mói makasi. Wana nde nyonso oyo bazalaka na yango.

⁵ Na bongo nakanisi na ntina na baoyo balalaka libanda kuna na ba zámba wana, ndenge bazalaki komema babéli wana, oyo bakokaki ata koningana te. Mpe na Inde, bakotia moko na nsé, nsima kotia moko likoló ya oyo moko, moko likoló ya oyo mosusu, ndenge wana, ná bokono ya mbálá ná makono; epai oyo bazalaki kobénda bango, mpe libanda na babalabala, mpe kolalisa bango na nsé na mói ya makasi wana, ya bikolo ya mói makasi. Kati na moepepe makasi, ná mikalí-kalí kopela-pela, mpe makambo ya ndenge wana, bakolala wana, na nsé ya mói ná moepepe makasi, mpe nyonso wana, koningana ata moke te to komilela-lela, kaka . . . mpe koluka kosimba Liloba moko ya Nzambe, mbala na mbala, eloko moko mpo na elimo na bango. Bongo mpo na nini tosengelaki kosenga bolimbisi na ntongo oyo, ná motóndo likoló ya mitó na biso, ná paka-páka ezali kosala? Tosengelaki koyoka nsoni soki tomileli-leli mpo na yango.

⁶ Boye nakanisi lisusu kala mingi te, na esanga moko, na moko na bisanga ya Mbu ya Sudi, Nazalaki na liyangani kuna na mpokwa wana. Mpe, oh, moepepe makasi eyaki. Oh, natikálá komona moepepe makasi ya bongo te, ná kopela-pela ya mikalí-kalí moko nsima na mosusu, kongengisa etuka yango. Mpe mipepe ezalaki kopepa mpenza makasi kino banzete ezalaki kolala na mabelé. Nalobaki: “Ee, bazali. . .Ekozala malamumu nálongola kazáka na ngai, mpo moto moko te akozala kuna.”

⁷ Nsima na mwa ntango, motuka ya moke ezongaki nsima kino na ekuke, mpe moto moko abetaki ekuke, tobelemaki mpo na kokende.

Nalobaki na elenge mobali yango, akokaki koloba Anglais, nalobaki: “Moto moko azali kuna?”

Alobaki: “Okoki ata kokóma na esika yango te,” ezalaki na ntáká moko monene ya lisano ya base-ball.

Nalobaki: “Olingi koloba ete bato bazali—bazali kuna, ndenge wana,” Nalobaki, “ná moepepe makasi nyonso oyo?”

Balobaki: “Bazali na mposa ya koyoka na ntina na Nzambe.”

⁸ Na—na boye nakendeki kuna. Mpe ezalaki na basi, bana ya basi, bilenge basi, bazalaki koseka-seka te, kosala maseki te, mpe kotafuna bazoká te, mpe kobeta masolo na ntina baninga na bango ya mibali te. Liloba moko na moko, bakangamaka na Yango; mpe baninganaka ata moke te, bafandaka kimia mpo na koyoka. Ezalaki ngai kobenga bato na etumbelo, kobenga kaka bato na etumbelo, mpe nkóto na nkóto batelemaki, ná mpisoli na miso, ndenge wana, ná maboko batomboli epai na Nzambe, mpo na kosenga mawa mpo na milimo na bango, bilenge basi ná mibali, ya mibu zomi na nsambo, zomi na mwambe. Sikawa, ezali mwa mpasi mpo na kosala ete ata mikólo báyoka, bomoni.

E—etalisi ete tozali mpenza na eloko ya komilela te. Matondi epai na Nzambe! Iyo, mesié.

⁹ Tokosepela kozala na makambo yango nyonso lokola bato ya Amerika nyonso, kasi tozali na yango bongo te; boye, tokobunda-bunda kaka na oyo tozali na yango.

¹⁰ Sikawa, nazali na mwa eloko moko oyo namonaki ete nakolinga kosala awa na tabernacle lisusu. Bato boni bazali na ba-Biblia? Bótombola loboko. Malamu. Tózua Nzembo 99 liboso tóbondela. Tozaláká kosala yango, Ndeko Neville, eleki mibú mingi. Nayebi te soki . . . Bosili kotánga Nzembo na ntongo oyo? [Ndeko Neville alobi: “Te.”—Mok.] Te. Nakosepela ete, losambo, tótánga eteni ya Nzembo yango.

¹¹ Na ntongo oyo, ntango nafandaki na biro na ngai na ndako, nazalaki komanyola Liteya oyo mpe Liloba, Nakanisaki: “Oyebi, ekozala malamu lisusu ete—ete nátángisa bango nyonso elongo Nzembo moko. Nalingaka yango mpenza.”

Ntina oyo nayaki mwa nsima na ntango, ezali mpo nazuaki mbela ya mosika, uta na Cheyenne, boye, nde ntina oyo yango ezalaki.

¹² Sikawa, wana tozali kobalola na Nzembo oyo, nazali na mwa mayebisi ya kopesa, oyo bauti kopesa ngai yango. Ezali Nzembo 99.

¹³ “Banda lelo, mayebisi nyonso oyo etali mayangani awa na tabernacle, mpe na makita, ekouta na biró na Jeffersonville. Moto nyonso oyo alingi koyeba na ntina na mayangani asengeli komikomisa, to kopesa nkombo na bango ná esika bafandaka, mpe kotia yango na eteyelo, na nsuka ya losambo na mpokwa ya lelo. Mokanda moko ekotindamela yo na ntango esengeli mpo ómibongisa mpo na koya na mayangani.”

Elingi koloba ete na mikolo ekoya, moto nyonso oyo alingi koyeba esika nini tokozala na mayangani, tobongisi lolenge ya kosala, kuna na biró, sikawa, ete okoki kaka kotika nkombo na yo mpe esika ofandi awa. Mpe tokotindela yo káláti moko, liboso na ntango, mpo óyeba esika oyo mayangani ezali kosalema, mpe ntango mosusu, ekozala na makambo tokolobela, ná makambo mosusu koleka, soki okokoka kozua libaku. Bomoni, soki ezali na esika eyebani te mpo na kopesa mayebisi yango, moko alobi *oyo* mpe mosusu alobi *oyo kuna*, o—okoyeba likambo yango te, bomoni. Boye kotika kaka . . . Komá nkombo mpe esika ofandaka mpe tia yango awa, mpe Billy Paul akozua yango mpe akotinda yango.

¹⁴ Sikawa, etunamaki mpe soki ekozala lisusu na . . . “Ndeko Branham, okosala lisusu mayangani ya kobondela mpo na babéli na tabernacle, ná lisosoli ya makanisi?” Te. Te. Lisosoli ya makanisi ekopesama na—na likita na biso mosusu. Tozali na Ndeko Neville awa sikawa, oyo azali na likabo ya lisakoli, oyo asakolaka mpo na babeli mpe ayebisaka bango makambo oyo

basengeli koyeba. Mpe tozali na ndeko moko, nkombo na ye Higg-. . . Higginbotham, moko na . . . azalaki moyangeli misolo, asalaki mosala na bosembo nyonso na likita yango. Nazomona ye te na ntongo oyo, kasi na momesano, azalaka na likabo ya koloba minoko na sika. Mpe mwasi moko na nkombo ya Arganbright, ndeko mwasi moke molingami, azali na likabo ya kolimbola minoko na sika.

¹⁵ Mpe bansango oyo ezali kotalisa polele ete euti na Nzambe, mpo ebimaka mpenza libanda na molongo te, etiami kaka na molongo. Mpe bobele na ntango oyo makabo yango ekobanda kobakisama, tokomeka ko—kozua. . .kofandisa yango mpenza semba na lolenge ya kosalela yango na kati ya losambo. Mpe nasengeli kotalela yango kala mingi te, mpe mpo ete ma—ete ma—mayangani ésalema mpenza na lolenge ebongi be kokokana na molongo ya Nkolo, ndenge tokoki mpenza kosala yango.

¹⁶ Kasi bato ya motuya oyo, ndenge mozalani na ngai alobaka, Mme Wood, oyo azali na micro moko awa, ná magnetophone moko kuna na nsima, mpo na kotia na bande liyangani, kaka mpo na kozua mateya yango na bande, mpe kokoma yango, mpo na koyeba soki ezali solo to te. Bomoni? Nde ndege wana azali kotala-tala yango. Nayebi ete Mme Wood azali mwasi moko sembo. Mpe azoyebisaka ngai makambo mingi oyo elobamaki, ezali kokokisama.

¹⁷ Sikawa, boye tozali kozongisa matondi mpo na yango. Yango ezali lisungi mpenza mpo na ngai na ndako awa! Ntango Nazongaka ndako, bongo. . .Lisosoli ya makanisi na ngámbo ya lisakoli, elembisaka ngai mingi mpenza, mpe, yango wana, Nzambe atindeli ngai mwa lisungi wana mpo na yango, na nzela ya lisakoli, mpe minoko na sika, mpe ndimbola, oyo ezali lisakoli. Yango ezali lisakoli, koloba minoko na sika. Ezali bato mibale bakeseni nde bazali kosakola. Moko alobi, mosusu asósoli oyo moninga alobi na minoko eyebani te, ezali mpenza lisakoli. Mpe sikawa tokozala. . .Tozalaka na yango mokolo na mokolo, na liyangani nyonso awa ntango tozalaka na milongo na biso ya mabondeli na liyangani.

¹⁸ Sikawa, ezali na moto moko oyo akolinga kotuna, atunaki. . .na ntina na likabo. Iyo, nazali naino na yango. Kasi lolenge wana, nzela kaka moko oyo nasalelaka yango, ezali na masolo ya moto na moto, oyo nazalaka na yango. Mpe, mpo na kozua yango, nandimi ete batiaka yango na etánda ya mayebisi, kuna na nsima, mpo na kopesama nzela mpe koyokana mpo na ntango ná Billy Paul, mwana na ngai ya mobali, kokutana awa to na mayangani nsima ya oyo. Kuna na bilanga ya mosala, ata wapi, osengeli kozala na mwa káláti oyo Billy Paul akopesa yo. Soki eloko moko ezali na bomoi na yo, oyo okoki kososola te, mpe oyebi ndenge ya kobima na yango te, mpe ozali koluka bwanya ya Nkolo, na bongo, tika. . .Kutana ná Billy Paul, mwana na

ngai, oyo azali sekretère, akopesa yo mwa kaláti, mpe akopesa yo mokolo, na ntango moko.

Na bongo, ntango tozalaka na masolo yango, na ntango wana nde tokótaka elongo, kaka yo ná ngai. Soko ezali basi, bokokota kuna elongo ná ngai ná mwasi na ngai. Na bongo, yo . . . Tokoluka koyeba, mpe koluka elongi na Nkolo mpo na kotuna Ye eloko nini osengeli kosala.

¹⁹ Sikawa, makambo mosusu ya mikemike mpe bongo na bongo ndenge wana, ekopesama epai ya Ndeko Neville, mpe Ndeko Higginbotham, mpe Ndeko mwasi Arganbright, ná bamosusu oyo balobaka minoko na sika mpe balímbolaka, baoyo bazalaka awa kati na losambo.

²⁰ Yango wana, tozali lokola na mobembo. Nakanisi ete ezalaki Jetelo, alobaki na Mose mokolo moko, bomoni: “Tózua mwa bampaka.” “Mpe Molimo na Nzambe ezuamaki uta na Mose mpe etiamaki likoló na bampaka ntuku nsambo, mpe basakolaki. Kasi Mose akolandela kaka makambo ya minene mpe ya makasi.” Sikawa, biso tozali Mose te, bango mpe bazali bampaka te, kasi tozali kaka kosalela Yawe Nzambe, ná Likonzi na Móto moko yango oyo ezali kokamba biso na Mboka na elaka.

Boye, na bongo, iyo, ekozala na bamosusu, ekozala na mayangani mpe ekozala na ndimbol- . . . Lisosoli ekosala mosala. Ekopesa ngai libaku malamu na ntango wana ya kobondela mpe koyekola, mikolo oyo nayebi ete nakozala na masolo ya moto na moto, mpe nakomilengela mpo na yango.

²¹ Sikoyo bóbosana te, Billy Paul Branham, sekretère na biso na elanga ya koteya, ako . . . Ezali na . . . Liyebisi etiami na etánda kuna, na bayángeli misolo. Nazali na lokasa moko awa mpo na koyebisa yango, mpe koloba na bato ete bákoka kotánga yango na etánda ya mayebisi, ntango bakobima.

²² Sikawa, sikawa, na ntongo oyo, tozali na liteya monene, mpe na mpokwa, tokomeka kokoba na yango. Mpe, soki Nkolo alingi, mokolo mwa Lomingo ekoya, oyo mosusu, kati na yango. Nayebaki te ete boni ebandaki kokóma bozindó mpenza kino nabandaki koyekola yango. Mpe ezali naino libombami mpo na ngai, atako bongo, mpe boye nazali kaka kotalela Nkolo.

²³ Sikawa, bino baoyo bozali na ba-Biblia na bino, tófungola na Njembo 99, 99. Nakotánga molongo ya 1, losambo ekotánga molongo ya 2, na nsima biso nyonso elongo, tokotánga molongo ya nsuka. Tokokoba; ngai, na oyo ya 1; losambo, oyo ya 2; ngai, ya 3; losambo, ya 4; kino na molongo ya nsuka, na bongo, biso nyonso tokotánga yango elongo. Tótelema, wana tozali kotánga Liloba na Nzambe.

Yawe azali mokonzi; tika ete bato bábanga: afandaka kati na bakeluba; tika ete mokili eningana.

YAWE azali monene kati na Siona; mpe akumisami likoló na bato yonso.

Tika ete bakumisa nkombo na Yo monene mpe na nsomo; mpo ezali búlee.

Nguya na mokonzi mpe elingi kosambisa alima; yo osili kolendisa sembo, mpe osalaka boyengebene mpe solo na Yakobo.

Bokumisa YAWE Nzambe na biso mpe bokumbama liboso na etemelo na makolo na ye; mpo azali búlee.

Mose mpe Alona bazalaki kati na banganga na ye, mpe Samwele kati na baoyo basambelaki na nkombo na ye; babiangaki YAWE, ye mpe azongiselaki bango liloba.

Alobaki na bango kati na likonzi na lipata: batosaki mibeko na ye mpe batoli oyo epesaki ye bango.

YAWE, Nzambe na biso, oyokaki kobondela na bango, yo ozalaki Nzambe oyo alimbisaka mabe na bango, kasi opesaki bango etumbu mpo na mabunga na bango.

Bokumisa YAWE Nzambe na biso mpe bokumbama na ngomba na ye na búlee. Zambi YAWE Nzambe na biso azali búlee.

24 Togumba mitó.

Solo, Nkolo, Maloba oyo ekomami mpe etiami na nkoma na nzela ya mosali na Yo, Dawidi, lokola Loyembo mpo na Yo. Ofandi katikati na Bakelúba. Ozali búlee, mpe ngomba na Yo ezali búlee. Tóbelema ná mitema na biso emwangelami na Makila ya Nkolo Yesu, ná lisosoli ya peto, ná kondima mpe assurance ete tozali kokóta Liboso na Nzambe na biso. Tika ete bayóki oyo, na ntongo oyo, bázala na limemia. Fungóla matoi ya lisosoli na biso. Lobá na nzela na biso, na bwanya, mpo tokoka koyeba ndenge tosengeli komikamba na mikolo oyo mpe Liboso na Yo.

25 Tokosenga na Yo, Nzambe na biso, ete ómonisa biso makambo ya nkukú oyo ebómbámaki na mibu nyonso oyo, wana tozali kobeleva na moko na Maloba ya sembo koleka, ya motuya koleka. Yo nde olobaki yango ntango Ozalaki awa na mokili, mpe olobaki: “Ye oyo akotánga, tika ete ásosola.” Boye, toyei epai na Yo na lolenge ya malamú koleka, Nkolo, mpe tosendi bwanya na Yo, wana toyebi mpenza te oyo ya koloba. Tobongisi mwa Makomi awa, mpe tozali kotalela Yo na nyonso mpe na mobimba mpo na eyano, na ntina mosusu te, bobele ete tókoka koyeba ngonga oyo tozali kobika kati na yango, mpo tókoka komiléngela mpo na makambo ya minene oyo ezali liboso. Okolinga kokokisa yango mpo na biso, Nkolo? Na Nkombo na Ye Oyo alakisaki biso nyonso ete tosengeli kobondela boye:

Tata na biso Oyo azali na Likoló, Nkombo na Yo ézala Mosantu.

Tika Bokonzi na Yo éya. Tika mokano na Yo ésalema na nsé, pelamoko na Likoló.

Pésa biso lelo bilei na biso ya mokolo na mokolo.

Mpe limbisa mabe na biso, pelamoko tokolimbisaka baoyo basalaka biso mabe.

Mpe kamba biso kati na komekama te, kasi bikisa biso na mabe; mpo Bokonzi ezali ya Yo, ná nguya, ná nkembo, libela na libela. Amen.

26 Bokoki kofanda. Sikawa, soki ezali mibali oyo balingi kolongola bakazaka na bango, bomiyoka nsómi na kosala yango. Mpe baoyo batelemi pembeni—pembeni na ngambo ya bitutú, soki makolo na bino ebandi kosala mpasi, boye, bómiyoka nsómi ya kobima kominiolola.

27 Mpe sikawa, nakanisi, soki bana balingi kokende na kelasi na bango, to basilaki kobima? [Ndeko Neville alobi: “Te, bakoki te. Tokoki kosala yango te na ntongo oyo, mpo bato baleki mingi.”—Mok.] Mokengeli alobi ete bato batondi na bakelasi yango, boye, tokoki kosala Ecodim te, mpo na bana mike. Mpe tokosepela, soki bino bana mike, sikawa, bokoki koyókana ná biso, mpo na ntongo oyo tozali na, tozobanda Liteya moko ya motuya monene mpenza, oyo, nandimisami ete, ekozala na ntina monene mpo na tata mpe mama na bino, mpe balingami na bino oyo bazali awa, mpe ata mpo na bino bana mike. Boye, tokobanda yango na limemia nyonso.

28 Soko Nkolo alingi, na ntongo oyo, tokozua motó ya liteya ya mpóso ntuku nsambo ya Danyele. Mpe na ntongo oyo tokoloba likoló na Danyele na boómbo, mpe Gabaliele koyáká na kopumbwa mpo na kopesa ye malako mpo na mikolo mikoya. Wana Danyele azalaki na libondeli, Gabriele, Mwanje, ayaki kopesa ye malako.

Na mpokwa oyo, nalingi koloba likoló na ntina motóba ya boyei na Ye, makambo motoba ekeseni oyo nakolobela na mpokwa oyo, eloko nini Gabriele ayélaki.

29 Mokolo ya Lomingo ekoya, soki Nkolo alingi, nalingi kotalisa ntina mpe ntango ya Bileko Nsambo Ya Lingomba, na ntango nini yango ezalaka, mpe esika nini tokomi lelo oyo. Ezali mpo na mokolo ya Lomingo ekoya na ntongo, soki Nkolo alingi.

30 Sikawa, ntina na likambo oyo. Namemaki mwa makambo nakomaki longwa na mwa Mateya ya nsuka oyo nateyaki. Mpe na ntongo oyo, nalingi kolandisa yango, mpo ezali na bande oyo ekokende na mokili mobimba, na bikólo ebele. Mpe, ntango nyonso, ntina oyo nazongelaka yango, ezali mpo, ntango mosusu, moto moko akoyoka bande mbala na ye ya liboso, kasi

akoki kozángá kosósola oyo nalingaki koloba, ntango nazongeli kolobela eloko mosusu.

³¹ Tosili kolekisa sikawa basanza kati na boyekoli ya Buku ya Emoniseli, Emoniseli Ya Yesu Klisto. Tosili koleka na bileko ya lingomba. Mikapo misato oyo ya liboso ya Emoniseli ezalaki bileko ya lingomba. Na nsima Yoane anétolamaki na mokapo ya 4 mpe ya 5, mpe amonisamaki makambo oyo—oyo esengelaki kosalema na nsima. Sikawa, na mokapo ya 6, akiti lisusu na mokili, mpo na komona makambo oyo ezalaki kosalema longwa mokapo ya 6, molongo ya 1, kino na mokapo ya 19, mpe molongo ya 21. Awa na kati ezali na Bilembo, Malózi, Mawa, mayoyo, mwa—mwasi kati na moi, mpe kobwakama ya dalagona motane, kotiamo elembo ya nkóto mokama na ntuku minei na minei, mpe makambo nyonso oyo.

³² Mposo oyo ezalaki mposo moko ya boyekoli ya kafukafu. Lobi, mokolo mobimba, nabimaki mpenza na biró te, kolukáká koyekola. Mpe ezali na eloko moko na ntango ya nsuka, mingi na bato ya kala awa, baoyo nateyaki, nazalaká koloba kaka: “Na kati awa ezali na mpóso ntuku nsambo ya Danyeale,” kasi namekaki kolobela yango te, kolimbola yango. Kasi mbala oyo, na ngolu na Nzambe, namipesi mokumba ya komeka kosenga ngolu liboso na Nzambe, mpo nákoka koteya yango na bato. Mpe na kati awa nazomona makambo oyo nayebi ata eloko moko te na ntina na yango.

³³ Mpe, bongo, na—nazalaki kotángá buku ya Dr. Larkin, buku ya Dr. Smith, makomi ya Dr. Scofield, ndimbola ndenge na ndenge ya bato ya bisika nyonso, mpe ata bongo, nakoki te kosangisa oyo ya bango mpo na kobimisa yango malamumu. Bomoni? Boye, na mpóso oyo nazali na mokano ya, kokende kotala bibliotek na Kentucky, mpo na kotángá bonganga-minzóto ya kala ya bamanáka mpe bantango, mpe kozua na ba-bibliotek wana, mpe bongo na bongo, babúku nyonso ya kala oyo nakoki kozua, mpe na moke oyo ngai nakoki kosala, mpe nazali kotia motema na ngai mobimba na Yesu Klisto mpo na komonisa ngai yango.

Mpamba te, nalingi te ete ngai nalóba: “Ngai nayebi *oyo*, mpe ngai nayebi *oyo wana*.” Ayebi motema na ngai. Azali koyoka ngai. Kasi nalingi koyeba yango, mpo nákoka kongengisa pole na bato na Ye, na yango nandimi ete Akopesa ngai yango. Nayebi naino te, kasi nazali kotiela Ye motema mpo na Lomingo ekoya, mpo ekozala eteni ya monene mpenza, Lomingo ekoya, mpo na koyeba mpe kotia mpóso ntuku nsambo wana na esika na yango.

³⁴ Moko na moko ezali na esika na yango. Mpe ntango osali bongo, osangisi yango nyonso na mobimba, ekopesa eloko ya solo te, ekobimisa eloko ya malamumu te. Ekokoka te. Mpe, yango wana, ntango mosusu na—nakokoka te kotia yango ndenge esengeli, kasi nakotia motema na Nkolo mpo na yango.

³⁵ Mpe nakanisi lisusu na ntina na Salomo, ntango moko, azalaki kobondela mpe kosenga na Nkolo Nzambe ete ápesa ye bwanya, mpo na ye moko te, “mpo na kobakisela ye mikolo te, mpo na bomoi molai te, mpo na bozui te,” kasi mpo ákoka kozala na bwanya ya koyeba ndenge nini ko—ko—kokata makambo ya libota na Nzambe. Mpe Nzambe ayanolaki libondeli yango, mpe apesaki Salomo bwanya yango, mpo ezalaki mpo na libota na Ye. Yango wana nazosenga na Nzambe ete áyebisa ngai ndimbola ya mpóso ntuku nsambo oyo, mpo nayebi ete ezali mpenza manákà mpo na eleko oyo tozobika kati na yango. Mpe, yango wana, nalingi koyeba yango; mpo na ngai moko te, nazali. . . mpo na ngai moko te. Na ntembe te, nalingi koyeba yango. Nalobi yango na lolenge wana te: “Mpo na ngai moko te,” mpo nalingi yango mpo na ngai moko. Nalingi koyeba yango, mpo nalingi koyeba esika nini tokomi sikoyo, mpe ntango nini tozali kobika kati na yango. Na, bongo, nayebi ete eloko yango epesamaki.

³⁶ Mpe bato mingi bakanisaki yango na ndenge na bango, mpe bakomisaki yango likambo esilá koleka. Moto moko, nazalaki kotángá, alobaki ete nyonso wana esilaki na mobu 1919, mpóso ntuku nsambo yango. Malamu, ezalaki bongo te.

Boye, nsima na mpóso ntuku nsambo, nsima na mpóso ntuku nsambo, nyonso esili. Boye, to—tolingi te. . . Tolingi koyeba Solo. Mpe nazosenga na Nzambe ápesa ngai Solo.

³⁷ Sikawa, mpo na kotia mobóko na likambo oyo, kozonga nsima, nalingi kozongela mwa moke oyo tosilaki komona. Boye, yango wana, nakomáki makambo mosusu oyo toyekolaki na mokapo ya 5, ya 4 mpe ya 5, mpo bato básosola. Liboso, liboso tósala yango, nalingi kolandisa yango, mpo bósosola longwa na oyo ya 4. . .

Sikawa, bóbosana te, mokapo ya 3 ezalaki Eleko ya Lingomba ya Laodikia, mpe Lingomba enétolamaki na nsuka ya Laodikia.

³⁸ Sikawa, nazalaki komeka kolimbola eloko moko na mwasi na ngai na ntina na yango. Nazuaki Becky, mwana na ngai, ná ba-diksionere ya ndenge nyonso mpe oyo tokokaki kozua. Epesaka eyano te. Nazuaki diksionere ya Biblia. Nazuaki diksionere ya Greki ya kala. Na—nazuaki Websters ná mosusu mingi, ba-diksionere ya mikolo oyo. Ata moko te kati na yango ekokaki ata kozua. . . kopesa maloba to eyano, ata ndenge nini.

³⁹ Mwasi na ngai alobaki: “Ndenge nini ozokanisa ete bato na biso oyo bazali babóla, mpe mingi kati na bango batángá te lokola biso, kosósola makambo ya ndenge wana?”

Nalobaki: “Nzambe akopesa eyano.”

⁴⁰ Ata soki ezali kpókósó ndenge nini, Nzambe akoki kokakola yango mpe kokómisa yango petee. Mpamba te tozali e. . . ndambo ya bato oyo tozali kozela na mposa makasi, kobondeláká mpo na mokolo wana mpe ngonga wana. Mpe miso na biso ezali

kotala Likoló, mpe tozali kozela Boyei na Ye. Mpe Nandimisami mpenza ete Akotalisa biso yango. Sikawa, ekoyebisa biso mokolo to ngonga te, mpo moto moko te akoyeba yango, kasi na bosolo, ekoyebisa biso mokolo ya mpóso oyo tozali kobika kati na yango, soki tokoki kaka kosósola yango.

⁴¹ Sikawa, na mokapo ya 4, Yoane anétolamaki mbala moko, nsima na Lingomba. Yoane, ntango amataki, amonaki eleko mobimba ya Lingomba. Wana nde epai wapi nakolinga kotelema, kaka mwa moke, mpo na koloba, ete: bato mingi oyo bazali kozela ete likambo moko ya monene, ya nguya, ésalema, na eleko ya Mabota, bazali solo na libunga. Eleko ya Lingomba, ná nyonso oyo ekosalema na ntango ya bokonzi ya Mabota, ekomami longwa na Emoniseli 1 kino na Emoniseli 3, na kati. Nsima Lingomba enétolamaki mpe ememamaki na likoló, mpe oyo etikali, kino na mokapo ya 19, ezali oyo ekosalema na libota ya Bayuda, nsima na Lingomba komata. Mpe ezali ntango ya Monyoko monene, eloko moko te ekosalema o ntei ya Mabota; kaka kobomama, mpe bongo na bongo, lokola tokoyekola mpe tokomona yango.

⁴² Kasi Lingomba, Yango moko, esili kokende na oyo ya 13. . . Na molongo ya nsuka ya mokapo ya 3 ya Emoniseli, ntango Eleko ya Lingomba ya Laodikia esili, oyo ezalaki ya nsuka.

⁴³ Mpe tozuaki eleko ya lingomba moko na moko, ntango moko moko, likambo moko na moko oyo esalemaki, monzoto moko na moko, motindami moko na moko, lolenge na bango, eloko oyo basalaki, mpe tomemaki yango na kati ya histoire, kino na oyo ya nsuka mpenza, eyemamaki wana na elilingi yango, na mopanzi ya etutú. Mpe ntango tosilisaki, Molimo Mosanto akotaki mpe ayemaki zolongano ya likambo yango mpenza na etutú, mpe amonisaki yango Ye moko, awa mpenza na biso nyonso.

⁴⁴ Sikawa, na kosaláká bongo, natii motema ete, na nsuka ya likambo oyo, Akoya na eloko moko ya monene mpenza, mpe akotalisa biso lisusu ete tozali na ntango ya nsuka.

⁴⁵ Bato boni kati na bino bayokaki Kennedy. . . lísikúlu ya Mokonzi ekolo Kennedy, makambo alobaki mpe bongo na bongo? Bato boni bayokaki likambo asakolaki, ete na mokolo ya 1 na sánzá ya Liboso, esakolamaki ete nyonso mibale Etats Unis ná Russia ekokóma mputulú ya volká? Yango nde nyonso oyo tosengeli na yango. Ntango eúmeli koleka oyo tozali kokanisa. Bomoni? Boye, soki tokómi mpenza pene na lolenge ete ata bato ya mokili oyo bakómi kosakola ete likambo ya nsómo wana ekokóma, malamú tózala na bokéngi, makambo nyonso na molongo, koyambola masamu nyonso esalemi, makambo nyonso ebelemi, mpo toyebi te ntango nini Nkolo na biso akobenga biso. Mpe ntango Akopesa motindo ete: “Matá likoló koleka,” malamú tómiléngela. Mpe ekosalema na ngonga oyo okanisi te.

46 Kolamuka monene ya ba-Pantekotiste ebandi kosila sikawa. Tozali komona yango bipai nyonso, mosala monene ya nsuka. Nsango esili kosakolama. Makambo nyonso ebelemi sikawa, ezali kozila. Lingomba esili kotiyama elembo. Bato na nkanza bazali kokóba kosala makambo na nkanza koleka. Mangomba bazali kokóma na ki-mangomba koleka. Basantu bazali kobelega pene na Nzambe koleka. Makabo ya Molimo ebandi koyíkana na bitóngá ya mike. Tokómi na ntango ya nsuka. Oh, Nalingaka loyembo oyo tozaláká koyemba na losambo.

Nazali kotálela boyei ya mokolo na esengo ya
Millenium wana,
Ntango Nkolo na biso mopambolami akoya
kokamata Mwasi na libala na Ye oyo azali
kozela;
Oh, motema na ngai ezali kolela, ná mposa ya
mokolo ya bokangolami yango,
Wana Mobikisi na biso akozonga na mabelé
lisusu.

47 Tozali kozela ngonga yango! Sikawa, na mokapo ya 5 mpe na molongo ya 5, tomoni, na liteya na biso elekaki, ete tolobaki na ntina na Tata Mosikoli wana, oyo tomonaki ete ezalaki Klisto. Tokokanisaki yango na Luta: Luta kozua mokáno; Luta kosala mosala; Luta kopema. Kozua mokáno, ezalaki kolongisama; Kosala, komiléngela, kobulisama; kopema, ezalaki ná Molimo Mosanto, kino mokolo Elambo ya Libala ekokaki. Kitoko mpenza!

48 Lingomba eleki na nzela na John Wesley, kolongisama, to... Martin Luther, kolongisama; na nzela na John Wesley, kobulisama; na nzela ya ba-Pantekotiste, libatisi ya Molimo Mosanto; mpe sikawa, kopema, kozela Boyei ya Nkolo na Ye. Na kobonga be!

49 Tata Mosikoli na biso, bampaka balobaki solo ntango babengaki Ye Mwana-mpate, pene na kokóma Nkosi, mosambisi. Azalaki Mwana-mpate, boyebi, ná Buku oyo ekangamaki na bilembo nsambo. Ntango Buku yango ezuumaki, mosala ya molobeli esilaki.

50 Sikawa, na mokapo ya 3, Lingomba emataki, kasi sikawa lisiko esengeli komonisama, ndenge oyo Lingomba esilaki kosikola—kosikolama, emoniseli ya likambo oyo esalemaki kati na bileko ya Lingomba. Bomoni, Lingomba esili kokende, boye Azali sikawa kotalisa, na mokapo ya 5, ndenge Asalaki yango, eloko nini esalemaki, ndenge Atiaki Lingomba elembo. Emoniseli ya Nkombo na Ye; libatisi na mai, kosalela Nkombo na Ye; Bomoi na Seko; lifelo ya Seko te; momboto na nyoka; kobatelama ya Seko; Malakisi minene nyonso, kobongisama liboso ya Lingomba, oyo emonisami na Lingomba. Azali kotalisa lolenge nini Asalaki yango.

⁵¹ Sikawa, Ebóto na biso, apesami Buku ya Lisiko moko oyo ekangámá ná bilembo nsambo útá na Mokóló na yango ya ebandeli. Amen! Oyo azalaki, tomoni, azalaki Mokóló na yango ya ebandeli? Nzambe Ye moko. “Mpe Mwana-mpate ayaki mpe azuaki Buku na loboko ya mobali ya Mofandi na Ngbende.” Mwana-mpate yango azalaki nani? Mosikoli, Tata Mosikoli na biso, Tata mosikoli mpo na Lingomba, Oyo ayaki pe asikolaki Yisraele.

⁵² Sikawa tokokóta na likambo yango mpenza na ntongo oyo. Yisraele asikolamaki, kasi esalemaki epai na bango te, mpo baboyaki Ye. Kasi, Lingomba eyambaki lisiko na bango, mpe Azali Tata Mosikoli na biso. Lokola Boaze asengelaki kosikola Naomi, mpo na kozua Luta, mo-Moaba, mopaya, moto na Mabota, boye Klisto asikolaki Yisraele, asalelaki lisiko yango, kasi aboyamaki.

⁵³ Bomikanisela bolimbisi, na moto oyo abetamaki masasi, oyo nalobelaka ntango mosusu? Na ntango ya etumba ya bana mboka, ntango. . . Azalaki moto malamú. Asalaki mabe te, kasi akweisamaki. Ata bongo, akweisamaki na lolenge moko boye, ete akimaki mosala ya sodá na ntango ya etumba. Bakweisaki ye mpe balingaki kobeta ye masasi. Moto moko akendeiki kokutana na tata Mokonzi ya mboka Lincoln mpe alobaki: “Mr. Lincoln, moto yango azali Moklisto. Abangaki mpenza. Mwana mobali yango, Nayebi libota na ye. Abangaki kaka kobanga. Akánaki kosala mabe te. Akimaki na ye.” Alobaki: “Mr. Lincoln, ezali na maboko na yo. Kaka Yo nde okoki kolimbisa ye.”

Mr. Lincoln azuaki eteni ya lokasa ná ekomeli na ye, mpe asiniaki: “*Songóló* alimbisami. Abraham Lincoln.”

Azóngaki mbangu na bolóko, mpe alobaki: “Yango oyo. Nazui bolimbisi na yo.”

⁵⁴ Kasi moto yango alobaki: “Naboi kotala yango. Elingaki kozala na elembo monene likoló na yango. Elingaki kozala na nyonso wana. Ozali kaka koluka kotiola ngai. Ezali Abraham Lincoln te. Moto nyonso akokaki kosinié nkombo na ye. Kasi elingaki kozala ya solo soki ezalaki na elembo na ye, mpe bongo na bongo, soki euti mpenza na ye.” Moto yango alukaki kondimisa ye; ata mobali yango azalaki na bolóko akanisaki ete azalaki kosala maseki, mpe akendeiki na ye.

Na ntongo oyo elandaki, babetaki ye masasi. Na bongo nsima na ye kobetama masasi, basambaki na esambiseli monene ya letá, mpo Abraham Lincoln, ngonga ntuku mibale na minei liboso bábéta mobali yango masasi, asiniaki nkombo na ye, ete mobali yango alimbisamaki. Na nsima letá ebetaki ye masasi, ata bongo. Bongo, ezalaki nini? Bongo, esambiseli ya letá ya Amerika, elobaki, ezuaki mokano oyo ya basámbisi ya Letá elobaki: “Bolimbisi ezali bolimbisi te longola bobele soki ezwami lokola bolimbisi.”

55 Mpe Yesu asikolaki Yisraele na Kalvari. Kasi ezalaki bolimbisi te mpo na bango, mpo bayambaki yango lokola bolimbisi te. Kasi, na liteya na biso sikawa, na ntina na mpóso ntuku nsambo oyo, tomoni ete bazongaki mpe bazuaki bolimbisi na bango. Kasi, Asikolaki Lingomba, na boye biso tolimbisami mpo toyambi Makila ya Yesu Klisto lokola bolimbisi na biso.

56 Sikawa, tomonaki ete Azalaki Tata Mosikoli na biso, mpe Azuaki Buku na loboko ya Mokóló na yango ya ebandeli. Ezali mokanda ya mokóló eloko mpo na lisiko. Tomonaki yango. Bozomikanisela boyekoli yango? Ezali mokanda ya mokóló eloko ya lisiko. Ezali mokanda ya mokóló eloko yango, oyo bakoki kotelemela te, na lolenge ete Nzambe asengaki bomoi mpo na liwa, na elanga ya Edene. Na nsima, Yesu, Moyengebene, akufaki mpe azuaki mokanda ya mokóló eloko, mpe azuaki makoki ya kobuka Bilembo, komonisa eloko nini ezalaki kati na Yango; mpe kopesa libula, oyo ezalaki ya Ye, na libota na Ye. Bomoi na Seko, oyo Asangolaki na kosaláká likambo yango, Apesaki Bomoi na Ye moko, na Kalvari, mpe Akabolaki yango katikati na biso na nzela na Molimo Mosanto. Amen! Moto moko te (ata moke te) asilá kokóma ata na kokanisa na ntina na bolingo oyo esengelaki kuna, oyo Ye asalaki!

57 Satana, oyo akómaki mokóló na yango mpo na kokweisama na elanga, akangamaki mpe abwakamaki na Libeke ya Móto. Mikolo na ye esili nye.

58 Yesu, na kati ya Nsango-malamu, azalaki na bibiangeli minei. Toyekolaki yango. Mwana na Dawídi, mosangoli ya Ngbende; Mwana na Abraham, likabo ya bokonzi; Mwana na moto, mosangoli ya mabelé; Mwana na Nzambe, mosangoli ya biloko nyonso. Likabo ya bokonzi!

59 Na Kondimana na Kala, bozui—bozui ekokaki kosimbama koleka mibu ntuku mitano te. Ekokaki kolongolama te na mokóló na yango ya ebandeli koleka mibu ntuku mitano. Mpe na mokolo ya ntuku minei, Afutaki ntalo. Na mokolo ya ntuku mitano, lisiko mpe nguya oyo ezalaki ya Lingomba, oyo ebungaki na elanga na Edene, esikolamaki lisusu, mpe etindamaki epai na biso na nzela na libatisi ya Molimo Mosanto, na mokolo ya ntuku mitano.

60 Na nsima tozuaki eloko oyo, mokanda. Tozuaki mikanda, ndenge nini mokanda yango esíláki kozonga na loboko na Ye. Ndenge Yilimia, na Yilimia 32:6, ndeko na ye, Anameele, atíkéláki ye libula. Kasi bazalaki kokende na boómbo. Kútu, tozokende kuna, elongo ná ye, na ntongo oyo: na boómbo. Mpe ebómbamaki na kati ya mbeki ya mabelé; ezali kotalisa esika oyo nguya ya Nzambe, mpe mikanda ná basekelé ya Nzambe eyebanaka, na kati ya motema. Mwango na biso ya lisiko, yango mpe ebombami na kati ya mbeki ya mabelé, Nkombo na Yesu mpe emoniseli.

⁶¹ Tomonaki ete ekangamaki na Bilembo Nsambo, mpe Elembo moko na moko ezingamaki zingazinga. Mpe ndenge emoniseli eyaki, Abendaki Elembo yango, akangoli yango mpe atangaki oyo Elembo yango elobaki. Na nsima, Akangolaki mokanda oyo elandi, mpe atángaki nini Elembo yango elobaki. Akangolaki oyo elandi, abendaki yango mpo na komona eloko nini Elembo yango elobaki, mpe oyo emoniseli yango ezalaki. Ezali mpenza yango nde Bilembo Nsambo na biso ekosala, totii motema, ete tokokota na yango kala mingi te. Elembo moko na moko, ntango elongolami na Buku, ekofungwama, mpe ekotalisa mpenza eloko nini esalemaki.

⁶² Tomonaki ete ezali na “nsambo,” mitano kati na mwango ya lisiko. Mitano ezali motango yango. Mpe ezali na bansambo mitano: Bilembo Nsambo, Milimo Nsambo, banje nsambo, Kelelo Nsambo, mpe bileko nsambo ya lingomba. Boye, bomoni, nsambo mitano yango ezali ngolu. Mitano ezali ngolu, mpe nsambo ezali bobongi be. Boye ezali mpenza kotambola malamumu be, bomoni. Malamumu.

⁶³ Ndakisa, Elembo moko na moko oyo ebukani na Liloba na Nzambe, emonisaka na moto ya eleko, eleko nini tozobika kati na yango, molimo ya eleko, lingomba ya eleko yango. Emoniseli 10, na nsuka, tomoni ete ntango Elembo ya nsuka ebukamaki, tomoni ete Mwanje ateleme, lokolo moko likoló ya mokili, mpe moko likoló ya mbu, ná maboko na Ye atomboli na Likoló, mpe monama likoló na motó na Ye, kokatáká ndai na Ye oyo azali na bomoi libela na libela, ete ntango esili, na Elembo ya nsuka. Bózela kino ntango tokobanda Bilembo yango, mpe tokomona esika nini Elembo yango ezali.

Nsima na bino komona mpóso ntuku nsambo, bongo bokomona esika nini Bilembo yango ezali: “Ntango esili,” lisiko esili, Azali sikawa Nkosi mpe Mosambisi. Azali Mobikisi na yo na ntango oyo, kasi mokolo moko Akozala Mosambisi na yo.

⁶⁴ Molongo ya 8 na ya 1 . . . ya 14 ya mokapo ya 5, emonisi ntango oyo bakosambela Mwana-mpate, na Likoló mpe na mabelé; Buku ya bilembo nsambo, Mwana-mpate oyo abongi, Tata Mosikoli. Mpe longwa na molongo ya 8, kino ya 14, Banje bakumbameli Ye, bampaka bakumbameli Ye, Bizali na bomoi bakumbameli Ye. Mpe Yoane akumbamelaki Ye mingi mpenza na lolenge ete alobaki: “Bikelamu nyonso na Likoló, na mabelé, na nsé ya mabelé, eyokaki ngai koloba: ‘Mapamboli, nkembo, nguya, bwanya, épesama na Mwana-mpate.’” Ntango ya kokumbamela Mokonzi Mwana-mpate. Sikawa, Lingomba esili kokende, bómikanisela.

⁶⁵ Sikawa tózua Danyele, mokapo ya 9, molongo ya 1 kino na ya 3. Na nsima tokozua molongo ya 20 kino ya 27, mpamnba te oyo ezali kaka libondeli ya Danyele. Nalingi ete

bótanga yango mbala na mbala, mpóso mobimba, sikawa, kino bokososola yango.

Na mbula ya liboso ya Dalio, mwana ya . . . momboto ya Bamadai, oyo akómaki mokonzi na mokili na Bakaladi;

Na mbula ya liboso ya bokonzi, ngai Danyele . . . -solaki, nasosolaki na babuku ete motángo ya . . . mbula, oyo liloba na Nzambe eyaki epai ya Yilimia mosakoli, ete akosala mibu ntuku nsambo mpo na libebi ya Yelusaleme.

Sikawa (oyo elandi) *nabalolaki elongi epai ya Nkolo Nzambe, mpo na koluka, na libondeli mpe na malómbo, mpe na kokila, na ngóto mpe na mputulú:*

. . . Nabondelaki YAWE . . . Nzambe, mpe nayambolaki . . .

⁶⁶ Mpe bongo na bongo akobi, kino sikawa, tokómi na molongo ya 20. Mpo na kowela ntango, bato oyo batelemi, nalingi ete bózua 20, kino tokokóma sikawa na—na molongo ya 20.

Mpe wana ezalaki ngai koloba, mpe kobondela, mpe koyámbola lisumu na ngai mpe lisumu ya libota na ngai Yisraele, mpe kopesa malómbo na ngai liboso na YAWE Nzambe na ngai mpo na ngomba mosantu ya Nzambe na ngai;

Nzoka nde, wana ezalaki ngai koloba na kati ya libondeli, moto yango Gabriele, oyo namonaki liboso na emononeli na ebandeli, abandi . . . apumbwaki mbangu epai na ngai, amamaki ngai na ntango ya mbeka ya mpokwa.

Ayebisaki ngai, asololaki na ngai, mpe alobaki: E Danyele, naye sikawa mpo na kopesa yo makoki mpe lisosoli.

⁶⁷ Bongo soki tokokaki bobele kozala kuna! Ndenge nini Amonaki ye? Kati na libondeli.

Mwanje yango, “moto yango.” Bótala malamú, abengaki Ye, “moto yango.” Mpe lokola . . .

Mpe na ebandeli ya malómbo na ngai, motíndo mobimaki, (ebimaki mpo na ye ákende), mpe ngai naye mpo na kotalisa yo yango; mpo ete yo olingami mingi: soki . . . yango wana, sosola likambo yango, mpe sosola emononeli yango.

Mpóso ntuku nsambo ekatami mpo na libota na yo mpe mpo na engumba mosantu na yo, to engumba na yo, mpo na kokokisa ekweli, . . . mpo na kosilisa lisumu, mpe mpo na kolimbisa mabe, mpe mpo na kokotisa boyengebene ya seko, mpe mpo na kokanga emononeli

mpe lisakoli na elemba, mpe mpo na kopakola esika eleki na Bulee.

Yango nde ntina motoba ya boyei na Ye. Sikawa bótala malamau.

Sikawa, yango wana, na yango, yeba mpe sosola, (sikawa bóyoka) ete longwa na kobima na mobeko ya kozongisa mpe ya kotonga Yelusaleme kino na . . . Mokonzi Masiya, mpóso nsambo, . . . mpóso ntuku motoba na mibale: mpe esika monene ya bato nyonso mpe bitutú, nde na ntango na mpasi.

. . . nsima na mpóso ntuku motoba na mibale, Masiya akolongolama, kasi mpo na ye moko te: bato ya mokonzi oyo akoya—mokonzi oyo akoya. . . kobebisa engumba mpe esika ya bulee; mpe nsuka na yango ekozala na mpela, . . . kino na nsuka, etumba ekozala, libebi lilakami.

Mpe ye akobatela mpenza kondimana (bóyoka) mpo na bato mingi mpo na mpóso moko, moko na bampóso ntuku nsambo oyo: mpe na katikati ya mpóso yango akosukia mbeka mpe. . . likabo, mpe moto oyo ayeisaka libebi akoya na mapapu ya biloko ya mbindo, kino nsuka, oyo elakami ekokwela mobebisi.

⁶⁸ Sikawa, yango nde liteya na biso mpo na mayangani misato, minei, mitano oyo ezali kolanda, ndenge Nkolo akolinga komonisa. “Mpóso ntuku nsambo.”

⁶⁹ Sikawa, nakosenga na Doc, soko alingi, ete na mpokwa, átia etánda na ngai kuna, mpo nákoka kotalisa yango. Nalingi te ete bózanga yango. Sikawa, bosengeli koyekola elongo na ngai, koyekola na bozindo, soki te, bokozanga yango. Mpe nalingi koyema yango awa na etánda, na bongo boya ná bikomeli mpe nkasa na bino mpo na kokoma ba-date oyo, bantango oyo, mpe nyonso na ntina na yango.

⁷⁰ Sikawa, mpóso ntuku nsambo ebandi (sikawa bósosola yango) nsima na Lingomba esili konétolama. Sikawa, moto nyonso oyo asosoli yango, áloba: “Amen.” [Losambo balobi: “Amen.”—Mok.] Sikawa, nsima na Lingomba esili konétolama.

⁷¹ Emoniseli 6:1, kino na Emoniseli 19:21, ezali na boyokani ná mpóso ntuku nsambo, yango wana tosengeli kotelema mpe kolimbola, yambo ete tókende mosika. Tosengeli kotelema mpe kolimbola ntina ya mpóso ntuku nsambo yango. Mpamba te, soki te, bokozánga Bilembo wana, bokozanga kelelo wana, Mbeki wana, Malozi wána, milimo misato ya mbindo wana lokola magbólódó, Mawa misato wana, kobwakama ya dalagona motane, mwasi na kati ya mói. Bokozanga yango nyonso, soki te, mpo ezali kosalema bobele awa, na kati ya mpóso ya ntuku nsambo oyo. Ezali kosalema nde kuna.

72 Sikawa, mosakoli Danyele asilaki kozala na Babilone mibu ntuku motoba na mwambe. Bino baoyo bokolinga kotala biteni yango, mpo bóbungisa ntango te, oyo ngai nalekisaki mpo—mpo na koluka yango. Mibu ntuku motoba na mwambe! Akendeki na boómbó na mobu 606 Liboso na Klisto, mpe ntango emononeli eyelaki ye, ezalaki—ezalaki na mobu 538 Liboso na Klisto. Kolongola 538 na 606, etikali ntuku motoba na mwambe. Asilaki kozala na Babele mibu ntuku motoba na mwambe, na kati ya bapakano, kasi azalaki kaka na elonga. Amen. Bisó tokoki kóumela ngonga moko te.

73 Kasi azalaki mpenza na katikati na bango, ná moto moko te kaka baninga misato, mpe bazalaki na bitúka mosusu ya bokonzi yango. Kasi, Danyele, ateleme ye moko elongo ná Nzambe, abatelaki elonga mibu ntuku motoba na mwambe. Bókanisa naino! Nalingi kobanda koteya te, mpo oyo esengeli nde kozala Liteya ya malakisi. Kasi, mibu ntuku motoba na mwambe, abatelaki elonga mpe amiyekisaki mbindo te, liboso na Nzambe; zángá libatizi ya Molimo Mosanto, zángá Makila ya Yesu Klisto mpo na kolobela ye; bobele ná makila ya bangombe, bantaba, mpe bana ngombe ya basi, oyo asengelaki kopesa mbeka na nkukú, mpo na mimesano ya bapakano ya mboka wana. Bamemámáká kuna. Yilimia asakóláká mpo na bango, ete bakokende kuna.

74 Sikawa, Danyele, oh, la la, abandaki komona ete ntango ezalaki kobelema, lokola biso lelo. Danyele abandaki “kososola,” ndenge alobaki, “na nzela na kotanga babuku.”

Mpe na mobu ya liboso ya bokonzi ya . . .Danyele . . . na bokonzi yango, ngai Danyele nasosolaki na nzela na babuku motángo ya . . .mbula, yango wana . . .libola na YAWE eyaki epai ya Yilimia, mosakoli, ete mibu ntuku nsambo esengeli kokokisama na . . .libebisi ya Yelusaleme.

75 Yilimia, na mobu 606 Liboso na Klisto, asakolaki, mpo na masumu mpe kozanga bobangi-Nzambe na bango, ete bakozala kuna mibu ntuku nsambo.

76 Boyebi lisusu, mosakoli mosusu ayaki na eleko wana. Nabosani nkombo na ye na ngonga oyo. Nakoki ntango mosusu koyeba yango lisusu mpo na bino na—na miniti moke, soki naluki mwa moke. Kasi apusanaki mpe alobaki: “Yilimia, ozali na libunga. Nzambe akobatela Yisalaele kuna na mikolo boye, na mibu boye, pene na mibu mibale.”

77 Yilimia alobaki: “Ézala bongo. Amen.” Alobaki: “Kasi zelá mwa moke. Tika ete yo ná ngai tótala yango elongo, lokola basakoli.” Alobaki: “Bobosana te, bato mosusu basakolaki liboso na biso, mpe balobaki makambo oyo ezalaki ya lokuta. Mpe Nzambe asilanaki ná bango mpo balobaki makambo ya lokuta.

Boye, tóndimisama mpenza. Kasi Nkolo Nzambe asili koyebisa ngai ete ezali mibu ntuku nsambo.”

Nzambe abetaki mosakoli ya lokuta wana, mpe Azuaki bomoi na ye mbula moko wana, mpamba te Nzambe autaki koyebisa mosakoli oyo ya solo ete mbula yango ezalaki ntuku nsambo.

⁷⁸ Mpe nalingi ete bómona ndenge nini Danyele, ata azalaki mopaya, ata abimisami ná libota na ye, abimisami ná lingomba na ye, kozanga molulu ya liyangani, kozanga losambo moko ya kokende, kozanga nzembo moko ya koyemba, bobele oyo azalaki koyemba ye moko, na kati ya nyonso wana, akangamaki kaka na oyo mosakoli wana alobáká. Amen! Amen!

⁷⁹ Losambo moko te ya kokende, moto moko te ya kosangana ná ye; bato nyonso bazalaki kokende na batempelo ya bapakano, bato nyonso bazalaki kosambela banzambe na bango ya bikeko. Nzembo ya Baklisto moko te; moto moko te azalaki na kondima moko ná ye. Mpe na mibu ntuku motoba na mwambe, uta ntango azalaki elenge ya mibu pene na zomi na mibale to zomi na minei, ntango amemamaki kuna, akangamaki solo na Nzambe; mpe asosolaki na nzela na mosakoli Yilimia ete mikolo yango ekómaki pene na kokokisama.

Likambo yango esengeli mpenza kokebisa motema ya mosakoli nyonso ya solo ya Nzambe lelo, ntango totalaka na nsima mpe tomonaka oyo mosakoli ya solo wana alobaki, mpe koyeba ete tokómi na ntango ya nsuka.

⁸⁰ Alobaki: “Nasosolaki na nzela na babuku oyo Yilimia, ndeko na ngai, eleki mibu ebele, ebele, asakolaki ete Yisraele bakozala awa mibu ntuku nsambo. Mpe ntango yango elingi kokoka.” Mpe amilengelaki. Abandisaki kokila bilei, amibulisaki, mpe ntango . . . mputulú mpe ngóto, mpe atiaki yango likoló ya motó na ye, mpe abandaki kokila bilei mpe kobondela, mpo ásosola mokolo nini bazalaki kobika kati na yango.

⁸¹ Mpe soki Danyele, mosakoli ya Nkolo, akokaki kotala na babuku ya Yilimia, mpe komema ye na esika ya lolenge wana; na lolenge ete ata Yisraele babimaki, baoyo nyonso na bomoi, babimaki na Babele, kozonga na mabelé na bango, esalaki ete ákila bilei mpe alátaki ngóto ná mputulú. Koleka boni likambo yango esengeli kosala na Lingomba na Nzambe na bomoi, mpo na koyeba ete ntango ebandi kosila mpe ekozala lisusu te; mpe Boyei na Nkolo Yesu Klisto, ná Millennium ya nkembo ebelemi mpo na kobanda! Ndenge nini tokoki kolekisa ntango ya kobebisa te, na masano ya mbongo, kokende kosukola na ba-pisini mikolo ya Lomingo, mpe ntango te mpo na Nkolo? Okopota mbangu kuna . . . Soki mokengeli alobi likambo moko oyo osepelaka na yango te, otelemi mpe obimi na yo. Mpe soki lo—soki losambo eumeli mingi, ee, o—o, o—osepeli na yo te. Bótala lolenge na biso. Bótala makambo oyo tozali kosala.

Tókokanisa bomoi na biso na mosakoli wana. Moto moko, na bokonzi mobimba, azalaki na losambo ya kokende te, mpe na esika mosusu te ya kokende. Nyonso ebukamaki mpe ezikisamaki; engumba na ye, bato na ye bazalaki na boómbo. Mibu ntuku motoba na mwambe! Ntuku motoba na mwambe, ntuku motoba na libwa, ntuku nsambo; atikalaki na mibu mibale. Boye, ntango abandaki kotánga na kati ya buku mpe amonaki ete ntango ezalaki kobeleva kokoka, mpo ékokisama, akendeki epai na Nzambe na libondeli, mpo na koyeba ntina ya likambo yango.

⁸² Ntango nini oyo! Tozali kosala nini? Wana, “Bikólo ezali kobukana; mbu ezali konguluma; mitema ya bato ezali kokwea na nsomo; bato bayebi eloko ya kosala te.” Makambo nyonso oyo, likomá na etutú. Kokabwana ya koponapona lángi ya loposo; mabe ya ndenge na ndenge kosalema na mokili; koswana, bitumba, ná mindondo. Mpe mandóki etiami na bibombelo, ete ekólo moko moke lokola Cuba, awa, ékoka kopanza mokili mobimba na minúti zomi. Kasi bazali koswana bamoko na bamosusu, bato ya mbindo oyo bayebi Nzambe te mpe bayebi nguya na Ye te.

Mpe Molimo Mosanto na kati na Lingomba, azali kosala mosala katikati na Baponami, azali komitalisa ete Azali na bomoi nsima na mibu nkoto mibale, ete Azali motindo moko lobi, lelo, mpe libela. Ndenge nini tokoki kofanda na zololo nyonso? Ndenge nini tokoki koleka likoló na makambo yango? Ntango ya komitala ekoki, wana tozali komona ngonga monene wana kobeleva.

⁸³ Sikawa, atángaki na Yilimia, mokapo ya 25. Tózua Yilimia, mokapo ya 25, mpe tótánga eloko nini Yilimia asengelaki koloba. Na bosolo, tóbanda na molongo ya 8, mpo ezali... Nalingi ete bósósola yango malamú mpenza. Molongo ya 11 nde esika nakomaki awa mpo na kotánga, kasi tóbanda na molongo ya 8.

Yango wana, yango elobi YAWÉ na bibeleva; . . .

Nasepelaka na yango mpenza. Ntango nakoki koyoka mosakoli koteleva ná YANGO ELOBI NKOLO NZAMBE, ndeko, yango nde. Mpo na ngai, yango ekati likambo. Nyonso esuki wana.

. . . yango elobi YAWÉ na bibeleva; mpo ete boyokaki maloba na ngai te,

Tala, nakotinda mpe nakozua mabota nyonso ya nordi, elobi YAWÉ, mpe nakotinda Nebukadanesala mokonzi ya Babeleva, mosali na ngai, mpe nakosala ete bázongisa . . . kotélemela mokili oyo, mpe kotélemela bafándi na yango, mpe kotélemela bikólo nyonso zinga-zinga na yango, mpe nakobebisa bango nye, . . .

Bómikanisela, bango bazalaki Baponami na Nzambe, baoyo Ye azalaki kolobela. Ezalaki bazángi kondima te. Ezalaki bandimi ya lingomba.

Nakolongola kati na bango mongongo ya koseka, . . . mongongo ya esengo, (lokola oyo tozali na yango lelo, ba-rock-and-roll nyonso, ná ba-Ricky ná ba-Elvis,) mpe, oh, mongongo ya mobali na libala, . . . mongongo ya ndeke. . . to, ya mwasi na libala, nde, makeléle ya libanga ya etútelo, . . . pole ya mwinda.

Mpe mboka mobimba oyo ekobebisama, . . .

Bóyoka mosakoli yango kogánga: “Mboka mobimba oyo ekobebisama!” Mpe ezali te mpo na komekola mosali monene oyo ya Nzambe, kasi nasakoli ete ekólo mobimba oyo ekobebisama nye. Nzambe akopésa etúmbu na ekólo oyo mpo na masumu na yango. Soki Nzambe aboyaki kotika Yisraele, Moponami na Ye, Momboto ya Abraham, oyo Ye apesaki bango kondimana mpe elaka, soki Atikaki bango te bákóba na misala na bango ya mabe; atako bazalaki basambeli kino na mikuwa, bazalaki na balosámbo ya minene, ná banganganzambe, mpe ba-lábi; kasi mpo na makambo ya mbindo ná makambo mosusu oyo ezalaki katikati na bango, Nzambe asalaki ete bábuká oyo balónaki, biso mpe tokozua likambo yango. Molongo ya 11:

. . . mboka mobimba oyo ekobebisama, mpe . . . eloko ya kokamwa; . . .

Elingi koloba, bato nyonso bakotala mpe bakoloba: “Bango wana. Bazalaki mpenza bato ya nguya. Tala bango sikawa.”

. . . mpe mabota oyo ekosalela mokonzi ya Babele mibu ntuku nsambo.

Ezali homoi mobimba. Ezali ntango mobange ya mama na yo mopambolami, azalaki mwana moké. Bazalaki kuna zángá Nzambe, zángá losambo, zángá loyembo, zángá nyonso, mpo na eleko ya libota mobimba, kino libota mobimba wana ya basumuki bakufaki.

Mpe ekosalema, ntango mibu ntuku nsambo ekosukisama, ete nakopesa etumbu na mokonzi ya Babele, mpe ekólo wana, elobi YAWÉ, mpo na bokesene na bango, mpe mboka ya Bakaladi, mpe nakokómisa yango libebi libela.

Nakoyeisa na mboka yango maloba nyonso oyo nalobaki kotemela yango, ata nyonso oyo ekomami na buku oyo, oyo Yilimia asili kosakola kotemela ekólo mobimba.

Mpamba te bikólo mingi mpe bakonzi minene bakomisalela—bakomisalela na bango lokola: mpe nakofuta . . . kokokana na misala na bango, mpe

kokokana na maloba na bango ya maboko na bango moko.

Mpamba te yango elobi YAWE Nzambe na Yisalaele na ngai; Kamata kopo ya vinyo ya nkele na loboko na ngai, mpe melisa bikólo nyonso, oyo nazali kotinda yo epai na bango, komela na yango.

Na elobeli mosusu: “Yilimia, napesi yo nsango oyo. Kofanda nye te. Kotikala na esika moko te, kasi sakólá na bikólo nyonso.” Bozali kolanda yango? “Sakólá na ekólo mobimba. Lakísa bilembo mpe bikamwa na Ngai, mpe yébisa bango ete Nazali koya kosala yango.”

Bakomela, mpe bakotenga-tenga, bakokóma lokola bilémá, mpo na liloba oyo Nakotinda kati na bango.

⁸⁴ Basálaka nini, lelo oyo mpenza? Babengaka yo mo—mosakoli ya lokuta, babengaka yo mo—mokokoli, babengaka yo mo—mondima-ndima, moto na solóka, to molóti bandoto, to moto moko oyo atángaka makanisi ya bato. “Bakokóma bilémá!” Mpe liloba oyo *elémá*, soko otali yango malamú, elingi koloba “ligbómá.” “Bakobéla mpenza ligbómá, mpe bakoloba: ‘Ah, bólánda motúntuki wana te, bozóba wana te,’ mpo na Liloba oyo Nakotinda katikati na bango.”

⁸⁵ Bomoni ete makambo ya kala ezóngaka kosalema lisusu, boye te? Yilimia ayokanaki te ná Bafalisayi na bango, Basadukayi, Baelode, nyonso oyo bango bakokaki kozala. Ye, alobaki Liloba polele, mpe Epésaki bango nyonso nkanda kotémela ye. Ezali nini? Sikawa bótala.

Mpe nsima nakamataki kopo na loboko na YAWE, mpe namelisaki yango bikólo nyonso, . . .

Yilimia atikalaki na ndako te. Yilimia akangamaki kaka na mwa esika moko te, kasi amelisaki yango bikólo nyonso.

. . . oyo YAWE atindaki ngai epai na bango:

⁸⁶ Yilimia azuaki Liloba na Nkolo, vinyo ya Liloba na Ye. Mpe vinyo ezali nguya ya Liloba na Ye. Vinyo ezalaka na nguya. Vinyo ezalaka molangwa. Vinyo ezalaka na nguya nsima na yango. “Nakamataki Liloba na Nkolo,” elobaki Yilimia, “mpe natalisaki Yango polele. Vinyo, nguya oyo ezalaka kati na Yango, nasalelaki yango liboso na bango, kasi balingaki koyoka Yango te.”

Nzambe alobaki: “Na nsima, Nakotinda bango mibu ntuku nsambo na Babele.” Yango mpenza nde eloko oyo Asalaki. Bayengebene ná bazangi-boyengebeni bakendeki, mpe lokola.

⁸⁷ Sikawa, tózonga na liteya. Danyele azalaki kotángá. Bókanisa naino, Danyele atángaki Maloba moko oyo tozali kotángá na ntongo oyo. Danyele atángaki Biblia moko oyo, bilembo moko oyo, masakola moko, makambo moko oyo, na lisungi ya Nzambe, nakotángela bino na mwa Mateya oyo

ekolanda, lolenge moko, mpo na kotalisa bino ete tozali na ntango ya nsuka.

Mpe Danyeale, azui Liloba ya Yilimia, akei na Babel. Mpe azalaki mosakoli apakolami. Asalaki bikamwa, bilembo, akokaki kolimbola minoko oyo eyebani te, mpe asalaki bilembo mpe bikamwa katikati na bango. Atako, azalaki ye moko, kaka ye moko! Amen! Atelemaki ye moko.

⁸⁸ Kasi Yilimia akomáká Maloba oyo mingi, mibu mingi liboso. Mpe Danyeale, na kolímóláká Liloba, azalaki na... “Tala, sikawa zela naino. Tozokóma pene na ntango ya nsuka, mpo nasili kokokisa mibu ntuku motoba na mwambe awa. Mpe mosakoli ya Nkolo,” amen, “ndeke na ngai, mosakoli ya solo ya Nzambe oyo amindimisaki ete azali mosakoli, asakolaki mpo na biso. Nazali na yango awa na buku moko, oyo elobaki: ‘Mibu ntuku nsambo ekokoka.’ E Nkolo Nzambe, tozobelema na nsuka. Libota nyonso wana esili kokufa nye. Okosala nini sikawa, Nkolo? Olakaki ete Okotindela biso...” Mpe amitiaki ye moko na molongo, mpo na kobondela.

⁸⁹ E Nzambe, soki etikálá kozala na ntango moko oyo tosengelaki komibongisa mpo na kobanda kobóndela, ezali nde sikawa. Mpamba te, biso, lokola mosali na Ye ya solo, tomoni, na nzela ya Mikanda ya ntóma, na nzela ya makébisu ya Molimo Mosanto, ete tozali na ntango ya nsuka. Molimo Mosanto alobi: “Ete na mikolo na nsuka, bato bakokóma bato na nko, bavímbe na lolendo, balingaka bisengo koléka Nzambe, bazáangi boboto, batóngi, batomboki, mpe bayini na baoyo basalaka malamú.” Nasosoli yango na nzela na Mokanda.

⁹⁰ Mpe nasosoli ete batioli bakoya, na mokolo ya nsuka. Nasosoli ete ekólo moko ekotelemela ekólo mosusu, na mokolo ya nsuka. Nasosoli ete mbóngé ya minene ekokwea na mokili, na mokolo ya nsuka. Nasosoli ete bato bakomona biloko ya kobangisa, lokola biyiká ya kopumbwa, na likoló, biloko ya nsómo, mpe mitema ya bato ekolemba na nsómo. Ekozala ntango moko ya mbilingambilinga, mpe mbutumbtu ekozala katikati na bato. Natáangi ete bango nyonso bakokóta na bibongiseli ná badenomination, mpe bakosala lisanga moko, na mokolo ya nsuka. Nasosoli ete basi bakokáta nsuki na bango na mokolo ya nsuka. Nasosoli ete bakolata bilamba ya mikuse, mpe bakotambola na basapáto ya milai, ezosaláká makeléle wana bazotambola, na mokolo ya nsuka. Nasosoli ete bizaleli malamú ekozala mingi mpenza te, na mokolo ya nsuka. Nasosoli ete batei bakozala babateli-mpate ya lokuta, na mokolo ya nsuka, ete bakokakolakakola, mpe bakoleisa bato Liloba na Nzambe te, kasi bakolanda bindimeli mpe biloko mosusu, na esika na yango. Kasi nasosoli ete Mongongo moko ekoya na mikolo na nsuka, oyo ekoganga uta na lisobé, kobenga bato bázonga na Nsango ya ebandeli, bázonga na makambo ya Nzambe. Nasosoli, na nzela na Buku, ete makambo yango ekosalema.

⁹¹ Nasosoli ete na mikolo na nsuka, nzala ekoya. Mangomba ekokoma ebongiseli mpenza mpe ekomifandisa mpenza ná makambo nyonso wana, na lolenge ete na mikolo na nsuka, nzala ekoya, mpe ekozala nzala ya lipa ná mai kaka te, kasi ya koyoka nde Liloba na Nzambe ya solo. Mpe bato bakokende na esti, na westi, na nordi mpe na sudi, kolukáká koyoka Liloba na Nzambe ya solo. Kasi mangomba ekokóma ebongiseli mpenza mpe ekomikembisa, na lolenge ete bakozánga koyoka Yango. Nasosoli yango na nzela ya ba-Buku. Kasi, na mokolo yango, E Nzambe, Etápe moko ekobima longwá na Dawidi.

⁹² Nasosoli ete Akotinda Eliya liboso mokolo yango ékoka na ntango ya nsuka, akozala na Nsango oyo ekozungisa mitema ya bana epai na batata, kozongisa bango na oyo ya ebandeli, kozonga lisusu na nsuka, mpe kobanda. Nasosoli ete ekosalema mpenza liboso Molimo étika lingomba ya Mabota, mpo na kozonga epai na Bayuda.

⁹³ Mpe nasosoli kaka na nzela ya Mokanda te. Nasosoli na nzela ya Liloba, na nzela na Liloba likomami, ete Yisraele akozonga na mabelé na ye; mpe nazomona ye kokóta.

⁹⁴ Nasosoli na nzela na Mikanda, ya basakoli, ete Yisraele ekokóma ekólo. Bakozongisa lisusu losambo na tempelo. Nzambe akoya kosala lisusu ná ye ntango akozonga na mabelé na ye. Oh! Basakoli mibale bakotelema na mikolo na nsuka, elongo ná bango. Nasosoli yango. Kaka ntango Lingomba ya Mabota elongwi, basakoli mibale bakoya, Elisa ná Mose, epai na Yisraele. Tokozua yango wana tozokende nzela-nzela.

⁹⁵ Mosakoli amonaki ete ntango ekomaki mpenza pene na kokokisama kuna na Babele. Malamu.

⁹⁶ Gabriele ayei, mpo na komonisa kaka makambo oyo azalaki kosenga te, kasi mpo na koyebisa ye nyonso oyo ekatamaki mpo na libota ya Bayuda, nyonso mpenza, kino na nsuka. Amen! Asengaki moke mpenza, kasi azuaki mobimba na yango. Atunaki kaka mpo áyeba. . .

⁹⁷ Danyele azalaki koluka koyeba: “Nkolo, etikali ntango boni sikawa? Yilimia mosakoli, mosali na Yo, ndeko na ngai, asakolaki eleki mibu ntuku motoba na mwambe, mpe alobaki ete, ‘libota oyo ekofanda awa mibu ntuku nsambo.’ Libota mobimba ya kala esili mpenza-mpenza kokufa sikawa.”

⁹⁸ Ezali na libota ya kala ya Pantekote oyo etelemaki, eleki mibu ntuku minei. “Babundi ya kala,” lokola babengamaki. Bamikomisaki ebongiseli, babundaki, baswanaki, ntango molai mpenza, kobanda na Ngomba Olebe kino na Nebo, kuna nyonso wana. Kasi, sukasuka, tokómi na ebale sikawa. Akotelemisa moko ya sika, ná Yosua mpo na komema bango na ngámbo. Mobeko ekweaki; Mose akendeki ná yango; Mose akweaki. Yosua amemaki bango na ngámbo. Tomoni ete bibongiseli esili kokwea, kasi Molimo ya Nzambe. . . Yosua, liloba oyo *Yosua*,

elingi koloba “Yesu Mobikisi na biso.” Ete, Molimo Mosanto ekoya na kati ya Lingomba. Ebongiseli moko te, kasi Molimo Mosanto ekoya katikati na bato mpe ekobongisa Ye mpo ámata, ákatisa Yaladene. Nasosoli, na nzela na kotánga Buku, ete yango nde esengeli kosalema. Mpe Nzambe ayebi ete yango nde oyo ngai nazali koluka sikawa, mpo nákoka kobondisa bato na Ye mpe koyebisa bango eloko nini esili kobelema, ézala awa na ntongo oyo, mpe na bikólo nyonso epai babande oyo ekokende, na mokili mobimba, ete tozali na ntango ya nsuka.

⁹⁹ Amonisaki nzela nyonso oyo kino ntango Bokonzi ezóngisamáki na mobimba mpe Millenium ebandaki. Yango nde ezalaki nsango ya Gabriele. Alobaki: “Nayeiy koyebisa yo ete etikali mibu ntuku nsambo, mpóso ntuku nsambo, nde, oyo ekátami mpo na libota na yo, ekátami kino na nsuka ya libota ya Bayuda. Ezali mpóso ntuku nsambo.” Sikawa bótala malamumu eloko nini Alobaki. Ete sikawa, kobanda kosakolama ya kozóngisa . . .

Mpóso ntuku nsambo ekátami mpo na libota na yo mpe mpo na engumba . . . na yo, . . .

“Engumba na yo.” Babel ezalaki engumba na ye te. Oyo . . . Engumba na ye ezalaki wapi? Yelusaleme.

¹⁰⁰ Sikawa, ntango tokokóma na—na nsambo, to kokokisama motoba, tokomona nini engumba yango ezali, mpe tokokitisa yango mpe tokondimisa nani yango ezalaki, nani abandisaki yango, esika nini eutaki. Ekoumela ntango boni? Ekotongama lisusu? Na ntango nini? Oh, makambo ya minene ezali kozela biso. Malamumu.

Mpóso ntuku nsambo ekatami mpo na libota na yo mpe mpo na engumba . . . na yo, mpo na kosilisa ekweli, . . .

Sikawa, Alobaki ata moke te: “Danyele . . .” Na ntembe te ete Ayebisaki ye ete mpóso ntuku nsambo ezalaki . . . Nalingi koloba, mibu ntuku nsambo ekómaki pene ya kosila. Ntuku motoba na mwambe, ezangi kaka mibu mibale. Mpe tomonaki ete lisakoli ya Yilimia ekokisamaki mpenza. Mbula mibale na nsima, babimaki. Nehemia akende mpe azuaki motindo longwa na mokonzi, mpe atongaki etutú na ntango ya yikiyiki. Basalaki mosala. Alobaki: “Etutú . . .” Bóyoka oyo.

. . . kosilisa ekweli, . . . mpo na kosukisa lisumu, . . .

“Mpo na kosukisa lisumu.” Mpo na nani? Mpo na Bayuda. “Ekátami mpo na libota na yo,” mpo na bato ya Mabota te. “Mpo na libota na yo,” Bayuda. “Mpe engumba na yo,” New York te, Boston te, Philadelphie te, Chicago te, Los Angeles te, Róma te. Kasi, “Likoló na engumba na yo,” Yelusaleme.

. . . mpe mpo na kosilisa ekweli, . . . kosukisa lisumu, . . . kozóngisa boyokani mpo na bokesene, mpe mpo na kokotisa boyengebene ya lobiko na lobiko, mpe

mpo na kotia elembo na emononeli mpe lisakoli, mpe mpo na kopakola esika eleki Bulee. (Bótala malamumu!)

Yango wana yeba mpe sósóla, ete longwa na kosakolama ya liloba ya kozongisa mpe kotonga lisusu Yelusaleme (oyo ezalaki engumba na ye) kino. . . na Masiya Mokonzi ekozala mpóso (ya ntuku nsambo) nsambo, . . .

¹⁰¹ Bózela kino tokokóma wana! Oh, la la! Ezali lipamboli ete na. . . nakosengela kozua singa moko mpo na komíkanga na esika oyo.

¹⁰² Amonisaki yango mobimba kino na nsuka, alobaki: “Nakoyebisa yo kaka sikawa te ete mibu mibale yango ekomi pene ya kosila, ekosila, ekokokisama.” Mpe biso nyonso toyebi ete bafandaki kuna mpenza mibu ntuku nsambo, mpe—mpe babimaki, ndenge mpenza mosakoli alobáká yango. Mpe Yisaya, to nalingi koloba. . . Danyele andimaki mosakoli wana, boye, ye wana, abelemi. Malamumu. Mpe a. . .

¹⁰³ Sikawa, ntango Gabriele ayaki, Alobaki: “Nayei kotalisa yo makambo nyonso kino na nsuka, komonisa yo makambo yango, ete, makambo nyonso kino na nsuka.” Bomoni? Bótala.

. . . mbindo akobebisa yango nye, ata kino na nsuka, . . .

¹⁰⁴ *Nsuka* ezali “nsuka ya makambo nyonso.” “Nakotalisa yo makambo ekosalema.” Sikawa bóyoka. Bósosola yango! “Ngai. . . Danyele, natindami. Yo ozali molingami na Lola. Mpe nayoki mabondeli na yo mpe nakiti sikawa mpo na koyebisa yo eloko nini ekátami mpo na Bayuda ná Yelusaleme, kobanda sikasikawa kino nsuka ya makambo nyonso, mobimba na yango.”

¹⁰⁵ Sikawa, kelasi, bozósósola? Soki tokoki komona eloko nini mpóso ntuku nsambo oyo ezali, toyebi ntango nini nsuka ezali. Oh, la la! Nzambe ásungu biso mpo na koyeba yango. Elobi na biso mpenza, na esika moko, na kati ya nkasa oyo, mpenza kobanda ntango wana kino na ntango oyo, kino na nsuka, mpe ekozángu ata moníti moko te.

¹⁰⁶ Ndenge nini Liloba monene ya Nzambe. . . Ntango Nzambe akelaki mabelé mpe atiaki yango na esika na yango. Mpe nazalaki koteya na mpokwa mosusu wana, mokolo ya Lomingu na mpokwa, ndenge ete eloko moko te ezangi. Ee, mokili oyo ebalukaka na kobonga be kino bakoki koyebisa bino mpenza ntango nini moi ná sanza ekoleka, na mibu ntuku mibale kobanda lelo, na miníti yango mpenza. Nakoki koyebisa bino te, ata na sáa nini oyo tozalaka na yango na mokili; ekozanga miníti mibale to misato na sanza, to ekoleka miníti mibale to misato, ya malamumu koleka oyo tozalaka na yango. Tokoki kosala eloko moko te ya kobonga be bongu. Mpamba te, eloko ya kobonga be ezali se

moko, ezali Nzambe. Mpe Nzambe ná Liloba na Ye bazali eloko moko, boye, Liloba na Nzambe ebongi be.

¹⁰⁷ Mpe soki tokoki komona mikolo yango, tokomona mpenza ntango nini nsuka ekozala. Bososoli yango? “Ekátámeli kino na nsuka.” Molongo ya 24, “libota na yo mpe engumba mosantu na yo,” oyo ezali Yelusaleme. Nazali na molongo ya 21 . . . ya 24 awa. Yesu alobelaki yango na Matai 24.

¹⁰⁸ Sikawa, Ndeko Collins, soki azali awa na ntongo oyo, nayebi te soki azali to te. Na mituna ya mpokwa mosusu wana, atunaki motuna moko. (Nabanzi ete ezali mabe te mpo na ngai koloba yango, Ndeko Collins.) Na ntina na, “‘Mbindo oyo ekoyeisa libebisi,’ bomoni, elingi koloba nini?”

¹⁰⁹ Yesu alobaki na ntina na yango, na Matai mokapo ya 24, tomonaki yango. Iyo, Matai 24:15. Sikawa tika názua yango nokinoki, mpo bókoka komona yango, Yesu azali koloba likambo yango moko awa, na kotángáka Danyele. Matai 24:15, mpo na bino baoyo bozali kokoma. Nalingi ete bino, moko na moko sikoyo, koleka mingi lelo na mpokwa mpe—mpe na Lomongo ekoya, bómema bikomeli ná nkasa, mpamba te tozali . . . longola kaka soko ozali na magnetophone. 24, mpe molongo ya 15: “Mpe ntango, yango wana . . .”

Bongo wana ekomona bino mbindo-na-libebisi, oyo elobamaki na mosakoli Danyele, . . .

Bókanisa! Oyo ezali mibu nkama minei na ntuku mwambe na misato, minei, mitano, ntuku mwambe na motoba liboso. Mibu nkama minei na ntuku mwambe na motoba liboso.

. . . mosakoli Danyele, etiami na esika ya bulee, . . .

Sikawa bótala kati na Biblia na bino. Ezali na kati ya bibokeli.

. . . (tika ete motángi ásósola:)

¹¹⁰ Sikawa, Azali kosolola na Bayuda. Balingi koyeba: “Ezali boni mpo na tempelo oyo? Ekobébisama ntango nini? Ekotongama lisusu ntango nini? Na ntango nini libanga moko ekotikala likoló na libanga mosusu te? Ekoumela ntango boni?”

¹¹¹ Alobaki: “Ntango bokomona ‘mbindo oyo ekoyeisa libebisi, kotelema ntango . . .’ Danyele, ‘etelemaki na esika ya bulee.’” Alobaki: “Ntango bokomona likambo oyo kosalema, sikawa, tika ete motángi ásósola eloko nini azali koloba.”

Yango wana tozobondela na Nzambe, ete ábongisa yango be, na lolenge ete ntembe ata moke ézala te. Mpamba te, tosendeli kotia ndimbola na biso moko na makambo wana te. Yango esengeli koya na nzela na YANGO ELOBI NKOLO. Boye, natiki yango wana, kino ntango nakososola.

Amonisaki makambo nyonso epai na ye, “mbindo” wana.

¹¹² Mpe, bómikanisela, ezali na ndimbola mibale, kaka lokola: “Bénga mwana na ngai kobima na Ejipito.” Ndenge Yisraele abéngamaki kobima, pelamoko Yesu, Mwana na Ye, abéngamaki kobima.

Mpe yango ekosalema mpenza ndenge wana, kaka ndenge natelemi awa mpenza. Mpe Asalaki yango na lolenge moko oyo Ye abombaki yango mobimba, abómbaki yango nyonso na Lingomba. Oh, ntango tokokóta na oyo wana, na lisósoli motóba wana, ndenge nini Abómbaki nyonso oyo mosika na Lingomba, mpo Lingomba ekozala kosénzéla likambo yango miníti moko na moko, lokola eyebaki te ntango nini Azalaki koya. Kasi sikawa, eleko ya Lingomba ekomi pene ya kosila, boye, esili kobeleva sikawa mpo na Boyei na Nkolo, ezali komilengela.

¹¹³ Oyo ezali moko na Makomi ya motuya koleka na Buku. Ezali kosala nini? Ezali kotalisa nsuka ya ekólo ya Bayuda, ya libota ya Bayuda. Likomi yango, mpóso ntuku nsambo, ezali kofungola mpe koyebisa mpenza kobanda ntango oyo Danyeleva abandaki kuna, kino nsuka ya makambo nyonso. Ezali moko na ba-sáa ya minene koleka. Bato boni basilá koyóká ngai koloba: “Soki olingi koyeba mokolo nini ya mpóso, tálá manáka. Soki olingi koyeba ntango nini tozali kobika kati na yango, tálá Bayuda?” Ezali ya solo. Yango nde manáka ya Nzambe, ezuami nde awa. Moto nyonso ya theologie, moyékoli nyonso ya Biblia, moto nyonso, akoyebisa yo ete oyo nde sáa, Bayuda.

Sikawa, tokómi ntango nini? Tokómi mpenza...bato, molunge, oh, na . . .

¹¹⁴ Ezali na eloko moko te ya kosala ná bato ya Mabota; Bilembo Nsambo oyo, Malózi Nsambo, Mawa Nsambo, Kelelo Nsambo, etali yango na eloko moko te. Lingomba ya Mabota ekozala na Nkembo na ntango wana. Ezali na eloko moko te ya kosala ná biso, Lingomba ya Mabota. Etali kaka Yisraele. “Danyeleva, libota na yo mpe Yelusaleme.”

¹¹⁵ Sikawa, mpe azali kotalisa likambo oyo, ete Nzambe asáláka na Bayuda káká ntango bazali na mabelé na bango. Aleluya! Na esika wana nde nakanisi ete etalisi likambo moko ya motuya, esika wana mpenza.

Bazalaka ntango nyonso komeka kotanga kobanda ntango oyo Yisraele azalaki kuna, na ntango ya Danyeleva. Mpe mokomi monene moko. . . Mpo, nayebi ete balandi na ye mosusu bazali awa, nakoloba yango te. Kasi yango nde ntina oyo bazalaki na makambo nyonso wana ya lokuta.

¹¹⁶ Boyebaki ndenge nini bato ya Millerite, liboso bákóma ba-Adventiste du Septieme-jour, eloko nini basalaki awa? Na mobu 1919, bazuaki mapapu na bango (bino nyonso bomonaki yango na zulunale Courier), mpe batelemaki awa mpo na kopumbwa, na ntongo wana. Bazuaki yango longwa na mpóso ntuku nsambo ya Danyeleva. Uh-huh, moto ya Millerite. Bongo,

na nsima, ná Mrs. Ellen White, oyo azalaki mwasi-mosakoli na bango, babóngwanaki mpe bamibengaki ba-Adventiste du Septieme jour. Sikawa, babongoli nkombo na bango, ekómi Mongongo ya Lisakoli. Bomoni? Nkombo misato ekeseni mpo na eyamba moko.

¹¹⁷ Sikawa, kasi bazalaki na libunga, mpo bazalaki komeka kosalela mpóso ntuku nsambo yango epai na Bayuda mpe epai na Mabota, na mbala moko. Mpe Alobi awa: “Ezali mpo na libota na yo.” Mpe Nzambe atikálá kosala ata moke te ná Bayuda libanda na Palestine. Bongo ntango Masiya, na mpóso ntuku nsambo, ná mposho mibale, alongolamaki, (mpo na Ye moko te; alongolamaki mpo na biso), Yisalaele epalanganaki, mpe atikali te (ata moke te) kozonga na mabelé na bango kino mwa mibu oyo eleki. Boye, ntango etángamaki te na kati wana, mpo na eleko ya Lingomba. Bosósóli yango? [Losambo balobi: “Amen.”—Mok.]

Elingaki kosalema na 1919 te. Nakoki kotalisa bino ete eloko moko te esálemaki na 1919, kasi ezalaki ntango Mwanje wana, nsango ya Mwanje ya misato eyokanaki mpe Mawa yango ebétaki. Ya solo mpenza. Kasi ezalaki te. . . Wana ezalaki ntango etumba esilaki na lolenge moko ya kokamwa. Tokomona yango na mokapo ya 7 ntango tokokóma wana, ntango tokokóma na mokapo ya 7. Bino nyonso boyóká ngai koteya yango, mbala mingi, bomoni, ntango nsango ya Mwanje yango elobaki: “Kangá mipepe minei ya mabelé, kino tokotia elembo na Bayuda, basali yango.” Sikawa, bazalaki kaka kozela kino eleko mobimba ya Mabota ésila.

Na nsima, ntango Akoti, na bongo—na bongo Atii Bayuda elembo, bato nkóto mokama na ntuku minei na minei bazui Molimo Mosanto. Wana nde nkoto mokama na ntuku minei na minei oyo batiamaki elembo. Emoniseli 7. Botángá yango.

“Mpe namonaki ebele monene oyo basilaki kozala na Likoló,” Yoane amonaki bato, “ya mabota nyonso, minoko nyonso, mpe bikólo nyonso, mpe batelemaki liboso na Nzambe, ná mangalála na maboko na bango, mpe balátaki bilamba mpembe, koyémbaka: ‘Aleluya! Amen! Nkembo, bwanya, lokumu, makasi, nguya, ézonga epai na Nzambe na biso libela na libela. Amen!’ bagangáki.”

¹¹⁸ Yoane akokaki kosósola te na ntango wana. Kasi atalaki na nsima mpe amonaki likoló na Ngomba Sinai, (nkembo) bato nkoto nkama na ntuku minei na minei oyo bamiyeisaki mbindo ná basi te. Bayuda! Basi, mangomba! Bakotaki na bibongiseli moko te, ba-Lutherien, ba-Methodiste, ba-Batiste, mpe ba-Presbiterien. Kasi bazalaki Bayuda uta na ebandeli, ba-Orthodoxe, mpe bazalaki na tempelo na bango kuna, bazalaki kosámbela na Ngomba Sinai. Bango nde nkóto mokama na ntuku minei na minei oyo. Oyo wana ezali nsima na oyo; Lingomba esili kokota na Nkembo. Bomoni?

¹¹⁹ Boye, Mr. Smith azalaki na libunga, asengelaki kozala. Mpamba te, lolenge nini okotia yango awa na 1919, kobimisa bato nkóto mokama na ntuku minei na minei oyo? Na bongo bozongi na malakisi ya Russell lisusu. Bomoni? Na bongo, bozongi mpenza na malakisi ya Russell, ete: “Yesu ayaki na 1914, na 1919 Akamataki Lingomba na Ye, mpe sikawa, Azali nzoto emonanaka te, oyo ezali kotambola na mokili mobimba, kosekwisa . . . kokende na nkunda ya mama nkoko mpe na nkunda ya tata nkoko, mpe kosekwisáká bango nyonso, baoyo nyonso bazalaki ba-Russelliste.” Boléma! Elongobani ata moke te na Liloba. Ekozala na molongo te. Te, misié. Ekosimba te.

¹²⁰ Kasi, Nzambe azali na Solo. Mpe Nzambe azali Ye Oyo akoki komonisa Yango mpe kotia Yango na kati kuna, mpe kolakisa biso Yango malamumu mpenza. Bomoni? Nandimi ete Akosala yango. Nayebi yango te. Nazali koyebisa bino Solo. Nayebi te, kasi nazondima. Nazondima ete Akosala yango.

¹²¹ Boye, bomoni, Nzambe atikálá kosala ata moke te ná Bayuda. (Nalingi ete bóbosana yango te) ntango nyonso oyo Yisraele . . .

¹²² Oyo wana nde ntango namekaki koyebisa na ndeko mobali oyo afandi awa, oyo azoloba na ntina na kokende na Yisraele, bózála mosika na Yisraele! Bózála mosika na yango, bino nyonso oyo bozoloba na ntina na kobongola Bayuda. Liboso Liteya oyo ésila, bokomona ete ezali YANGO ELOBI NKOLO, na nzela na Liloba mpe na nzela ya Molimo. Yisraele ekobongwana, ekólo mobimba, na butu moko. Biblia elobi bongo. Kasi Nsango-malamumu ekomi kutu epai na bango te. Ezali na mwa bato-bawángána oyo bazali libanda, mpe bongo na bongo ndenge wana, oyo bakoti, mpe bazali libanda na nzoto mpenza ya Bayuda, oyo bakoti mpe babikisami. Ezali ya solo. Nandimaka yango na mo—motema mobimba.

Kasi, bómikanisela, na ntango nyonso oyo Yisraele azalaka libanda na ekólo na bango, bakoki kobikisama te. Sikawa, bazali kozonga. Mpe bakobikisama, ekólo mobimba, na mokolo moko. Biblia elobi bongo. Mokolo moko; bakozonga, bango nyonso, Yisraele mobimba bakozóngela Nzambe. Likambo moko ya nguya mpenza ekobeta Yisraele moko na mikolo oyo, na lolenge ete ekoningsisa ekólo mobimba. Ata mosakoli agángaki, mpe alobaki: “Na mokolo moko, osalaki likambo oyo.” Na mokolo moko, bakomona Yango. Ekozala likambo moko ya nguya.

¹²³ Mpo na ngai, mosakoli moko ya nguya akoya mpe akotelema liboso na Yisraele, mpo na kondimisa bango ete Masiya yango azali naino na bomoi. Masiya oyo baboyaki azali . . . ? . . .

¹²⁴ Bazali kotángá Biblia moke wana sikawa, Biblia ya Yisraele. Batángaka Yango kobanda na nsima kino na liboso, ndenge batángaka Yango. Boyebi ndenge lokota ya Bayuda ekomamaka. Boye, ntango batángaka Yango . . . Mpe batángaka yango, Lewi

Pethrus atindelaki bango ba-Biblia milió mobimba. Bango balobaki: “Soki Yesu oyo. . .” Ezalaki Bayuda oyo bautaki na Iran, mpe na bamboka wana, bayóká naino likambo moko lokola Masiya ata mokolo moko te. Mpe, ntango bamilengelaki mpo na kozonga na mabelé na bango, ee, baboyaki komata na bampépo wana. Bazalaki naino kobalola mabelé ná bisalelo ya kala. Botángaki yango na zulunale *Look*. Bato boni batángaki makambo yango na zulun- *Look* mpe *Times*. . .? Ee, ya solo mpenza. Bomoni? Balingaki komata kuna te. Mobange ya lábi wana atelemaki wana mpe alobaki: “Bómikanisela, mosakoli na biso alobaki ete tokozonga na mabelé na biso na mapapu ya mpongo.” Aleluya!

Bikólo ezali kopanzana, Yisalaele ezali
kolamuka,
Bilembo oyo Biblia elobaki liboso;
Ntango ya Mabota ekómi ya kotánga, etondi na
nsomo;
“Bózonga, E bapalangani, epai na bino.”

¹²⁵ Ekozala malamumu ete bóbanda kolamuka. Bosilá koyóka yango mpe boyókáki yango, mpe boyókáki yango, kasi ekozala mbala ya nsuka, moko na mikolo oyo. Yisraele azali kozonga na mabelé na ye. Mokolo oyo Nzambe akokána ete Yisraele ékóma ekólo, ezali mokolo wana nde moto ya Mabota ata moko te akobikisama lisusu.

¹²⁶ Nakotalisa yango na nzela na mpóso ntuku nsambo oyo, soki nakoki bobele komona mikolo yango. Nazokende na. . . kozua bamanáka ya astronomie, mpe—mpe oyo ya Julien, ya astronomie, ná ya Roma, mpe nyonso na yango. Ezali na mosusu koleka, esika moko boye. Eloko moko ezali. Nzambe ayebi yango, mpe, A—Azali na makoki ya komonisa yango. Bomoni? Nayebi ete manáka Julien ezalaka na mikolo nkama misato na ntuku motoba na mitano mpe ndambo moko ya eteni ya mokolo, na mobu. Boye, oh, nyonso ezali na mobúlú, kasi solo moko ezali, esika moko.

¹²⁷ Namonaka mangomba mingi mpenza, bibongiseli mingi mpenza, bato mingi mpenza oyo basalaka *boye*, mpe bamosusu: “Maria losako,” mpe bamosusu basámbelaka *oyo*, *oyo wana*, mpe *oyo mosusu*. Solo moko esengeli kozala esika moko. Nzambe moko asengeli kozala, esika moko. Nsango moko esengeli kozala, esika moko. Nazalai komona basakoli ya lokuta kotelema, kosala makambo lokola lisosoli ya makanisi, ná makambo mosusu ya ndenge na ndenge oyo ezali kosalema. Na bongo, oyo ya solosolo esengeli kozala kuna, esika moko, oyo bamekoli basalaka uta na yango.

¹²⁸ Nazali komona bato kokota na mosuni, kogánga, kosala bisálélá, mpe kobima mpe kobika bomoi ya mbindo. Molimo Mosanto moko ya solosolo esengeli kozala kuna, esika moko.

Namonaka bato komekola kosala lokola basámбели, mpe bongo na bongo, mpe komeka kokóma basántu. Nayebi ete Nzambe ya solosolo azali, esika moko. Molimo ya solosolo ezali, esika moko, mpo ezali mokosi moko oyo amekolaka uta na yango, oyo wana ezali moniato moko ya kala. Eloko moko esengeli kozala, oyo ezali solosolo: moto moko, libota moko, Lingomba moko, Nzambe moko. Eloko moko ya solo esengeli kozala, esika moko, mpo baoyo ezalaki kaka komekola uta na yango. Eloko moko ya solo ezali, esika moko.

¹²⁹ Nalobaki na losambo oyo, na ntina na makabo na bino. Bóyoka makabo na bino; bóbatela yango na kati ya Biblia. Bózua eloko mosusu te, na ntango oyo likoló etóndi na makabo ya solosolo. Tóbatela oyo ya solosolo. Tózua oyo ya solosolo, soki te, bózala na yango ata moko te. Amen.

¹³⁰ Sikawa, mpo na kosilisa, ezali ya solo ete Nzambe asalaka na Yisraele kaka soki azali na mabelé na ye. Ndakisa, ntango Nzambe. . . Abraham atikaki mabelé na ye mpe akendeki na Ejípito, eloko nini esalemaki? Akendeki mosika na mokano ya Nzambe, mpe atikálá kopambólama te, kino azongaki na mabelé na ye. Nzambe atikala kosala na ye te, emononeli moko te, eloko mosusu te, kino azongaki na mabelé na ye.

¹³¹ Bótala Yisraele ntango batindamaki na Ejípito, mibu nkama minei. Ekamwiseli moko te, elembo moko te, eloko moko te esálemaki katikati na bango, eloko moko te ekomami na masolo ya Buku. Kaka makambo moko wana ya kala, kokende na losambo, kopesa mbeka ya mwana-mpate, koloba “Maria losako,” to eloko nini mosusu, kozonga. Mobu ekolanda, ndenge moko. Ba-nganganzambe nyonso bazalaki kowelana: “Labi *Songolo-pakala!* Tokopona Labi *Songolo-pakala*. Azali na diplome ya malamú koleka. Ayebi makambo ya Ba-ezipito mingi koleka.” Na mbala moko, Ba-ezipito ná—ná bango nyonso, bazalaki ndenge moko.

¹³² Yango nde likambo moko oyo esili kokóma na lingomba. Biso nyonso tokómi ba-Metodiste, to ba-Batiste, to ba-Presbiterien. “Mpe tozali na diplome ya Hartford! Tozali na diplome ya Wheaton! Tozali na diplome ya esika moko mosusu, to ya Bob Jones! Biso, tozali na Licence en Lettres! Tozali na Doctorat en Theologie, Doctorat en Droit., to eloko mosusu!” Epesi nini na nsuka? Libóke ya bolémá.

Ezali lolenge wana nde ezalaki na Ezipito. Mpe Nzambe atikálá kosalela Yisraele te kino ázonga na mabelé na ye.

¹³³ Bóyoka ngai! YANGO ELOBI NKOLO, Nzambe akosala ná Lingomba na Ye te kino Akozonga na mabelé na yango, Nsango ya Ntango. Bózonga na oyo ya ebandeli! Bótika makanisi na bino ya ba-Metodiste, ba-Batiste, ba-Presibiterien; ba-Pantekotiste na bino, ba-Assemblée, ba-Unitaires, ba-Trinitaires, ná ba-Mitano, ézala ata ba-nani; eglise de dieu, ba-Nazareen, ba-

Pelerin de la Sainteté, eglise de Christ, ná masángá nyonso ya batemeli-Klisto! Mpe nasosoli ete likambo oyo ekokende na mokili mobimba. Bango nyonso bazali na libunga; bango nyonso bato ya zabolo. Oh, la la! Basantu bazali kati na moko moko na yango. Basantu bazalaka na masángá nyonso wana. Kasi ebongiseli, na yango moko, ezali ya Nzambe te, mpe Nzambe akotikaláká kopambola yango ata moke te. Atikalá kosala yango te.

¹³⁴ Nasengi na historien nyonso (bokoyoka bande oyo) ákomela ngai mpe áyebisa ngai ntango nyonso oyo, lingomba ekomaki ebongiseli, soki Nzambe atiaki yango pembeni te mpe atikalá kosala na yango lisusu te. Bóyebisa ngai ntango nini Ye atikalá kotelemisa lisusu ba-Lutherien, ba-Wesleyen ná ba-Methodiste, to ba-Pantekotiste. Esálémá ata moke te! Ebongiseli yango etikalaki wana, ebebaki mpe epolaki! Nzambe azuaki bato moko moko mpe atalisaki bango nzela ya kozonga na mabelé na bango. Na nsima, bato yango, balembá mpe bakómá mpenza lokola basi, ná diplome moko boye, na lolenge ete basalaki ebongiseli mosusu, oyo esalaki ete ákoma mwana ya lifelo mbala mibale, koleka oyo azalaki na ebandeli.

¹³⁵ Kasi, esika moko boye, na bosolo, Yawe azali na moto oyo Akoki kozua na maboko na Ye, oyo akokakola ata moke te ná bango. . . ya mbi-, bibongiseli ya mbindo; moto oyo akozongisa bato na Libanga, Yesu Klisto, bakozonga na Pantekote ya ebandeli mpe na Molimo Mosanto ya ebandeli, ná bilembo ya ebandeli mpe bikamwa ya ebandeli. Ya solo Azali na moto moko, esika moko, oyo akomitika ata moke te na monyókó ya ndenge nini, akokima te, akotika te, akokweya te, eloko mosusu te; moto oyo akotelema ngwi.

Nzambe apambolaka Yisraele ata moke te kino akozonga na mabelé na ye.

¹³⁶ Nzambe akopambola yo ata moke te, lokola Methodiste, Batiste, Presibiterien, Katoliko, to Pelerin de la Sainteté, Nazaréen, eglise du Christ, to—to ebongiseli ya ba-Pantekotiste. Akotikaláká kopambola yo na nzela wana te. Bózonga na mabelé na bino, na ebandeli, bózonga na makambo bobikaki na Pantekote ndenge esalemaki na Mokolo ya Pantekote, ntango Nguya na Nzambe na bomoi ebongolaki nkóto na nkóto na bato wana, mpe epelisaki mitema na bango na Móto ya Nzambe, oyo etalisaki bilembo ya solosolo; ya komekola te, ezali te lolenge moko ya kotanga makanisi oyo ebongisami, ezali te litio moko boye, mpo ékoma likambo ya kowelana, ndenge tozalaka na yango na Amerika. “Nani akoki kozala na héma ya monene koleka?” To, “Nani akoki kozala na bato ebele koleka?” Bokeseni nini yango ekosala mpo na Nzambe? Nzambe alingaka bato ya sembo na motema, etonga monene te. Kasi biso nyonso tokomi na kowelana awa, kopota-mbangu. Nsoni nini oyo, kotala soki tokoki kobakisa bato koleka nkóto moko na ebongiseli na biso.

Ezali nsoni. Ye alingi ete tózonga na Solo, tózonga na Molimo, tózonga na Pole ya solo, tózonga na nzela monene kati na Klisto, tózonga na Solo. Ndenge nini Ye akoki mpenza kopambola biso na lolenge tozali kokende? Akosala yango te.

¹³⁷ Atikalá kopambola Yisraele te, kino bazongaki na mboka ya elaka. Mpe ntango bazongaki na mboka ya elaka, bilembo mpe bikamwa ebandaki kosalema. Atindaki moto moko katikati na bango, na nkombo ya Mose. Eloko nini Mose yango ayaki na yango kuna, theologie oyo ebongisama malamu? Ayaki na diplome ya Licence en Lettre? Ayaki nde ná Doctorat ya Droit., Doctorat ya Philosophie? Ayaki ná nguya na Jehovah, mpe ná nsango moko: “Bózonga, uta na mabelé oyo, kino na mabelé na bino. Bózonga, E bapalangani, epai na baoyo ya bino.” Amen!

¹³⁸ Na mibu pene na nkóto mibale, Bayuda bazalaki libanda ya mabelé na bango, bapalanganaki na mipepe minei ya mokili. Tokokaki mpenza kosala ete Liteya oyo éumela bampóso sikawa, soko tosengelaki kokota na bozindo. Tokoki kolanda Yisalaele na nsima mpe kotalisa ntango Bokonzi ya Roma epalanganisaki bango, mpo babóyaki Masiya; ndenge bapalanganaki na bikólo nyonso na nsé ya Lola.

Tokoki kozónge kino na Yakobo, Yisraele, na Genese 44 mpe 45, mpe kotalisa kuna lolenge apambolaki bampaka wana mpe ayebisaki bango mpenza lolenge nini bakozala na mikolo ya nsuka. Mpe nakoki kotalisa bino mpenza (ekólo moko na moko) ya Yisraele, libota moko na moko ya Yisraele, oyo etiami mpenza na kati ya bikólo esika oyo elobamaki ete bakozala. Mpe tozali awa lelo.

¹³⁹ Moyuda oyo toyebi, ezali Moyuda ya solo te. Moyuda ya solo, ezali oyo wana ya Orthodox ya solo, oyo amiyeisi mbindo te ná biloko ya mokili, oyo aboyaki kokende kokota na mangomba mosusu. Ezali baoyo wana nde bazali kozonga kuna, baoyo bazali kobika na fromage ná lipa, na mopanzi na bangomba, bapesami nzela ya kokota na engumba ya kala wana te. Basengelaki komitongela engumba na ngámbo oyo, libanda na mboka, ná mandóki ezotala na ngámbo nyonso mibale. Kasi asili kobanda kobimisa nkasa ya sika. Amen, mpe amen! Ntango ekómi pene.

¹⁴⁰ Yismaele ná Yisaka bazali naino kuna, bazali koswana mpo na mabelé, kasi ezali ya Yisraele. Soki esalemi ete okei na Yelusaleme ya sika, bakotika yo te óya na Yelusaleme ya kala. Osengeli liboso kokende kuna mpo kotika bango bálimbolela yo nyonso wana, ba-Alabo, na nsima, bakolekisa yo na ngámbo mosusu. Bango bazali bana ya Yismaele. Kasi, bózela, ntango moko ekoya, oyo bana na Nzambe bakozua yango lisusu. Ezali solo. Yelusaleme ekotongama lisusu. Mbeka ya mokolo na mokolo ekotiamana.

Mpe motemeli na Klisto akosala kondimana mpo na mpóso nsambo ya nsuka. Mpe na katikati na yango, akobuka kondimana yango, akokotisa bango nyonso na Bokatoliko. Mbindo yango ekopalangana bisika nyonso, nsima na yango, nsuka ekoya.

¹⁴¹ Bótala malamú, “mpóso ntuku nsambo.” Iyo, ekokisi pene na mibu nkóto mibale oyo bazali mosika na yango; Babenganaki bango sikawa, bato na bango; lolenge esalemaki ntango motema ya Falo eyeisamaki makasi, Asengelaki koyeisa makasi motema ya Hitler. Milió na milió ya bato bakufaki. Bótala Eichmann wana, akweisami mpo abomaki Bayuda milió motoba. Milió motoba na bango, milimo ya bato, babebé, bana mike, mikóló, bango nyonso babomamaki; Eichmann, moto moko. Bótala Russia, ndenge bobenganaki bango kuna. Babenganaki bango bipai nyonso. Bakómáki ekólo oyo etiolami.

¹⁴² Kasi mpo na bolingo na bango ya mbongo, bazóngaki. Kasi bato moke wana mpenza bazali kozonga na Palestine. Amen, bandeko! Ntango bokomona ye kobanda kozonga na mabelé na ye!

¹⁴³ Bakómi mingi kuna, sikawa, bakoki kokokisa pene na nkóto mokama na ntuku minei na minei. Mpe eloko nini ezosalema? Bakoyeba Yosefe na bango. Bómitungisa te. Iyo, misié. Mpe bango nyonso oyo bazali kuna, bazali kozela ete ésalema. Mpe na ngonga mpenza oyo. . .

¹⁴⁴ Bikólo esili kondima bango lokola ekólo, na mobu moleki. Ntango yaango ekosalema, tokokóma pene na nsuka, Lingomba ya Mabota ekosila kokende. Boye, ata na ntango nini, Nzambe akoki koloba: “Yisraele azali libota na Ngai.” Ntango ekosalema, esili mpo na Mabota.

¹⁴⁵ “Bakonyata,” elobaki Yesu, na Matai 24. “Mbindo ekomema libebisi, bakonyata bitutú ya Yelusaleme kino ntango eleko ya Mabota ekosila.” Ntango yango ekosila, bongo nde Bayuda bakozonga na Yelusaleme, mpo na kotelemisa lisusu tempelo mpe losambo na tempelo. Tokomona nyonso wana na Mateya oyo ekolanda, mpóso ntuku nsambo, ntina na yango motoba.

Sikawa nakotángá yango liboso tósilisa, mpo ekotikala moke tózonga na ndako, na nsima kozonga na mpokwa ya lelo na ngonga ya nsambo.

¹⁴⁶ Liboso, liboso, soko bozali kokoma yango: “Mpo na kosilisa ekweli.” Daniele, mokapo ya 9, molongo ya 24. “Kosilisa ekweli,” moko. “Kosukisa lisumu,” mibale. “Kosala boyokani mpo na bokesene,” misato. “Koyeisa boyengebene lobiko na lobiko,” minei. “Kókanga emononeli mpe lisakoli na elembo,” mitano. “Kopakola esika eleki Bulee,” motoba. Na ntina na yango nde tokoloba na mpokwa oyo. Nzambe oyo azali kokokisa!

¹⁴⁷ Sikawa bózela, tika ete nábandela yango, mpo bósosola yango. Ya liboso, “kosilisa ekweli.” Ya mibele, “kosukisa

lisumu.” Ya misato, “kosala boyokani mpo na bokesene.” Ya minei, “koyeisa boyengebene lobiko na lobiko.” Ya mitano, “kokanga na elembo emononeli mpe lisakoli.” Ya motoba, “kopakola esika eleki Bulee.”

Bótika nátángela bino yango sikawa, na—na Biblia. Ezali molongo ya 24.

Mpóso... nsambo ekatami mpo na bato na yo (Bayuda) mpe likoló na—mpe likoló na engumba mosanto na yo (Yisraele, Bayuda, Yelusaleme), mpo na kosilisa...ekweli (moko),...kosukisa lisumu (mibale),...kozongisa boyokani mpo na bokesene (misato),...kopesa boyengebene lobiko na lobiko (minei), mpe mpo na kokanga emononeli na elembo (mitano)—emononeli mpe lisakoli, mpe kopakola esika eleki Bulee (motoba).

148 Yango mpenza nde eloko oyo Ayaki koyebisa ye, oyo ekosalema, na nsima, nsuka ekoya.

149 Sikawa, na mpokwa, tokoyekola eloko nini makambo yango ezali, mpe tokomona boni tobelemi na likambo yango. Na nsima, Lomingo oyo ekoya, tokomona mpe tokotia bilembo ya ntango yango mpenza na esika tokómi. Nalingi Ye.

150 Yisraele azali kozonga na mabelé na ye, Yisraele. Tika ete náloba likambo oyo sikawa wana... Nabanzi ete ezali kotiamana na bande te. Tika ete náloba likambo oyo. Na ngonga mpenza oyo Yisraele ekómaki ekólo... Ntina oyo nandimaka ntango nyonso, nazoloba yango liboso eyanganelo na ngai awa, ete ezalaki na eloko moko ete nakozala na eteni ya mosala ya kosala, liboso nákufa, ya kozongisa Yisraele epai ya Nkolo. Mpamba te, na ngonga yango mpenza, kokokana na boyokani ya Lisangana ya Amerika, ntango Yisraele endimamaki ekólo, mbala ya liboso nsima na mibu nkóto mibale kobanda ntango bapalanganaki, bazalaki lisusu libota te; ezalaki na ngonga moko wana, na ngonga wana mpenza, nde Mwanje na Nkolo akutanaki na ngai kuna mpe Atindaki ngai na... ná Nsango-malamu. Eloko moko mpenza, mokolo ya 7 sanza ya Mitano na mobu 1946.

151 Sikawa, na nsima, eloko mosusu oyo etalisaka ngai ete nayeba yango. Ezali “kozongisa mitema ya bana epai ya batata, mpe mitema ya batata epai ya bana,” Nsango. Botala malamumu, Malaki 4 (3 te), 4!

152 Likambo mosusu. Ntango Billy, mwana na ngai ya mobali, ná ngai ná Ndeko Ern Baxter, tozalaki kokende na Palestine, nsima na biso kokutana ná Bayuda epai ya Ndeko Arganbright, mpe bamonaki liyangani. Lewi Pethrus atindáká ba-Biblia kuna. Mpe alobaki... Bayuda yango bayaki, balobaki: “Soki bobengisi lisangá ya bakambi ya Yisraele, elingi koloba, ba-lábi oyo ya sika te, ná milúlu na bango, kasi soki bobengisi mpe boyanganisi bakambi mpenza ya Yisraele. Mpe totángaki Kondimana na

Sika oyo, mpe toyebi ete ntango Masiya akoya, Akoyebisa biso makambo oyo, lokola mwasi wana na Samalia. Toyebi ete Mose alobaki ete Masiya na biso akozala mosakoli. Mpe ntango okoki koyebisa bango mpe kolakisa bango, na nzela na Makomi,” yango nde tokomona na Liteya ya mpokwa oyo, “ete basengelaki kozipama miso mpe mitema na bango esengelaki kolongolama, mpo na kopesa nzela ete eleko ya Mabota éya, ete tókoka kozala na ntango ya kozongisa boyokani mpo na Mabota. Mpe mitema na bango eyeisamaki makasi, kaka ndenge esalemaki na ntango ya Yosefe, mpe bongo na bongo. Na nsima, komema Bayuda yango esika moko, mpe kobenga bato wana na eyanganelo, kaka ndenge bosalaka awa ná bato ya Mabota, na nzela na mpémela wana ya Molimo. Mpamba te,” balobaki, “soki Yesu oyo, soki Ye azali Masiya, mpe maloba na yo ezali solo, na bongo, Ye akúfá te, mpe Azali na bomoi. Mpe soki Azali na bomoi, Alakaki ete Akozala na kati na oyo ya Ye. . . basal- . . . mosali—basali na Ye, bayekoli na Ye. Mpe soki tokoki komona Ye kosala elembo ya mosakoli, na bongo tokondima ete Ye azali Masiya.”

Ebongi mpenza be, ezali mpenza bongo. Bongo, ekosala nini? Ekólo mobimba ekobótama na mokolo moko, katikati na bakambi. Moko na moko na bango akoloba: “Toyebi yango.” Ntango lábi wana alobi yango, ekati likambo. Ekólo mobimba ekobótama na mokolo moko. Yisraele ekobotama na mokolo moko.

¹⁵³ Nazalaki na nzela mpo na kokende kuna, totelemaki na Caire, na Ejipito, ná tiké na loboko na ngai, etikalaki miníti zomi na mitano to ntuku mibale liboso bábenga bato. Balingaki kobanda kobenga bato. Mpe nakitaki mpo na komona eteni moke ya libaya ya moíndo, ná nzoko moke oyo esalemi na libaya ya moindo, ná mino—mino ya nzoku. Nalingaki kotindela yango moninga na ngai, Dr. Sam Adair, mpo ásalela yango lokola enyateli ya nkásá ya mokanda. Nazalaki kotala yango. Mpe Eloko moko elobaki na ngai: “Ngonga yango ekoki naino te. Zala libanda ya Palestine.”

¹⁵⁴ Boye, nakanisaki: “Oyo ezali kaka makanisi na ngai.” Mpe nakobaki na ngai.

Eloko moko elobaki: “Oyo ezali ngonga yango te.”

¹⁵⁵ Mpe nakendeki na nsima ya libandaúli. Natombolaki motó epai na Nzambe. Nalobaki: “E Nzambe, Yo nde ozalaki koloba na ngai?”

¹⁵⁶ Alobaki: “Ngonga yango ezali sikawa te. Zala libanda ya Palestine. Oyo ezali ntango yango te.” Bongo, nazuaki tiké na ngai mpe nabongolaki nzela, nalongwaki wana, nalekaki na Roma mpe nazongaki na Lisbone, na Portugal, mpe kolongwa wana, nazongaki na Amerika.

¹⁵⁷ Ngonga yango ekokaki naino te. Bokesene ya bato ya Mabota etondaki naino te, kino na nsuka ya kopo. Kasi mokolo moko,

ekotonda, mpe Nzambe akotinda moto moko kuna, oyo akozala mosakoli, mpe akondimisa bango. Natii motema ete Nzambe akotelemisa ye nokinoki, ézala ata nani, akotelemisa ye na lombangu. Nandimi ete esengeli kosalema. Yango wana tozali koyekola likambo oyo, mpo tokómi mpenza pene.

¹⁵⁸ Mpe, bómikanisela, kaka na miníti oyo Bayuda bakoyamba Klisto, Lingomba ya Mabota esili kokende. Nsima na yango, Mabota ekomona Malozi kosopana likoló na bango, Monyoko.

¹⁵⁹ Mpe—mpe ndenge nini bato, balakisi ya minene bakoki koteya, wana bazali kotala na Biblia oyo boye, mpe koloba ete Lingomba ekoleka na eleko ya Monyoko, ntango oyo ata Likomi moko te na Biblia elobi yango! Bazali ata na eloko moko te.

¹⁶⁰ Moto moko ayebisaki ngai, kala mingi te, alobaki: “Oh, Ndeko mwasi McPherson alakisaki ete Lingomba ekoleka na Monyoko, mpo biso tokozala minda oyo ekozala kongenga na ntango yango.” Ekozala Yisraele na ntango wana, Mabota te.

Bato na Mabota bakosila kokende, Lingomba. Bango basengeli koleka na Monyoko moko te. “Dalagona abimisaki mai na monoko na ye,” mokapo ya 17, “mpe abundaki etumba ná baoyo batikalaki,” báseka ya mpongi. Ezali te. . . Lingomba ya solosolo esili kokende. Ekosila kozala na Elambo ya Libala mpo na oyo, ntango nyonso ya Elambo ya Libala, na mpóso ya nsuka. Na ntango yango nde Monyoko ekobanda, ntango mayoyo ná minioko ekobeta mangomba, makambo ya ndenge wana.

Bongo, na nsuka, na mokapo ya 19, Ye wana azali koya ná Mobali na Ye ya libala. Aleluya! “Mokonzi na mokonzi, mpe Nkolo na bankolo; ná Makila na elamba, mpe mampinga ya Likoló ezali kolanda ná bampunda ya mpembe, bazali koya ná Ye elongo. Tala Ye wana azali koya, mpo na kozua esika na Ye mpo na Mbula nkóto. Amen! Oh!

Nkombo épambolama, oh, Nkombo
épambolama,
Nkombo na Nkolo épambolama;
Nkombo épambolama, oh, Nkombo
épambolama,
Nkombo na Nkolo épambolama.

Yesu nde Nkombo, Yesu nde Nkombo,
Yesu nde Nkombo na Nkolo;
Yesu nde Nkombo, oh, Yesu nde Nkombo,
Yesu nde Nkombo na Nkolo.

Kumisa Nkombo na Ye, oh, kumisa Nkombo na
Ye,
Oh, kumisa Nkombo na Nkolo;
Kumisa Nkombo, oh, kumisa Nkombo,
Kumisa Nkombo na Nkolo.

¹⁶¹ Basalaka yango ndenge nini? Kómisa Yango monene na bomoi na yo. Bika bomoi oyo ekosala ete bato bálوبا: “Oyo wana azali mosali ya Klisto.” Ndenge wana nde bakumisaka Nkombo yango. Tótala naino. Oh, bolingaka Ye te? Oh, la la! Loyembo na biso ya moke sikawa:

Na elielo moko ya bibwele, kalakala, Nayebi
ete ezali mpenza bongo,
Mwana moko abotamaki mpo na kobikisa bato
na masumu na bango.
Yoane amonaki Ye na libongo, Mwana-mpate
mpo na bileko nyonso,

Mwana-mpate ná Bilembo Nsambo wana, bobele Ye, na Likoló mpe na nsé, azalaki na makoki ya kozua yango.

Na elielo—na elielo moko ya bibwele, kalakala,
nayebi ete ezali mpenza bongo,
Mwana moko abotamaki mpo na kobikisa bato
na masumu na bango.
Yoane amonaki Ye na libongo, Mwana-mpate
mpo na bileko nyonso,
Oh, Nkombo na Nkolo épambolama.
Oh, Nkombo épambolama, oh, Nkombo
épambolama,
Nkombo na Nkolo épambolama;
Nkombo épambolama, Nkombo épambolama,
Nkombo na Nkolo épambolama.

¹⁶² Nasepelaka kokumbamela. Bino te? Sikawa, toyaka na losambo te kaka mpo na koyoka liteya; etambolaka elongo ná yango. Kasi toyaka na losambo mpo na kokumbamela, kokumbamela na Molimo mpe na Solo. Bosili koyoka Solo, ezali Liloba. Bomoni? Sikawa, kokumbamela, ezali koloba maloba na yo moko epai na Ye. Bomoni?

Oh, Nalingaka Mobali Oyo Ya Galilai, Betela biso mwa loyembo yango. Iyo, misié. Oyebi yango, Teddy? Nabosani sikawa. Zela naino. Zela naino.

Oh, Nalingaka Mobali oyo ya Galilai, ya
Galilai,
Mpo Asali mpenza mingi mpo na ngai.
Alimbisi masumu na ngai nyonso, Atii Molimo
Mosanto na kati;
Oh, Nalingaka, Nalingaka Mobali oyo ya
Galilai.

Mokongoli mpako akendeki kobondela na
tempelo, kuna, mokolo moko,
Agángaki: “E Nkolo, yókela ngai mawa!”
Alimbisamaki na masumu nyonso, mpe kimia
monene etiamaki na kati;
Alobaki: “Bóya kotala Mobali oyo ya Galilai.”

Oh, Nalingaka Mobali oyo ya Galilai, ya Galilai,
 Mpo Asali mpenza mingi mpo na ngai.
 Alimbisi na masumu na ngai nyonso, Atii Molimo Mosanto na kati.
 Oh, Nalingaka, Nalingaka Mobali oyo ya Galilai.

Ebosono atámbolaki, emimi alobáki,
 Nguya wana elobamaki ná bolingo likoló na mbu.
 Mokufi miso amonaki, nayebi ete ekokaki kozala bobele
 Nguya ya Mobali oyo ya Galilai.

Oh, nalingaka Mobali oyo ya Galilai, ya Galilai,
 Mpo Asali mpenza mingi mpo na ngai.
 Alimbisi masumu na ngai, Atii Molimo Mosanto na kati.
 Oh, nalingaka, nalingaka Mobali oyo ya Galilai.

Bóyoka oyo:

Mwasi wana na liziba ya mai, Ayebisaki ye masumu na ye nyonso,
 Ete azalaki na mibali mitano na ntango wana.
 (Ezali Ye.)
 Alimbisamaki na masumu nyonso, mpe kimia monene ekotaki na kati;
 Bongo agángaki: “Bóya kotala Mobali oyo ya Galilai!”

Oh, nalingaka Mobali oyo ya Galilai, ya Galilai,
 Mpo Asali mpenza mingi mpo na ngai.
 Alimbisi masumu na ngai nyonso, Atii Molimo Mosanto na kati.
 Oh, nalingaka, nalingaka Mobali oyo ya Galilai.

Nalingi Ye. Bino mpe? Na motema na ngai mobimba! Bino mpe? Azali malamumu, boye te?

Oh, malamumu, malamumu, Yesu azali mpo na ngai,
 (Azali nini?)
 Mosungi, Mokonzi na Kimia, Nzambe na Nguya ezali Ye;
 Oh, abikisi ngai, abateli ngai na masumu mpe nsoni nyonso,
 Mosikoli na ngai azali malamumu, masanzoli na Nkombo na Ye!

Tógúmba mitó na biso sikawa mpe tókanisa na ntina na yango.

Kalakala, nabungaki, kasi sikawa, nazuami,
Nazali sómi na kokweisama, (Bikólo ezali
kobukana; etali ngai te.)

Yesu apesaka bonsómi mpe lobiko mobimba;
Abikisi ngai, Azali kobatela ngai na masumu
mpe nsoni nyonso,
Mosikoli na ngai azali malamumu, masanzoli na
Nkombo na Ye!

Oh, malamumu, malamumu, Yesu azali mpo na ngai,
Mosungi, Mokonzi na Kimia, Nzambe na
Nguya ezali Ye;
Abikisi ngai, abateli ngai na masumu mpe
nsoni nyonso,
Mosikoli na ngai azali malamumu, masanzoli na
Nkombo na Ye!

Oh, bókanisa yango!

Kalakala, nabungaki, sikawa, nazuami, nazali
nsómi na kokweisama,
Yesu apesaka bonsómi mpe lobiko mobimba;
Abikisi ngai, (Asalaka nini?) abateli ngai
na masumu mpe nsoni nyonso, (Nazali
kotambola likoló na yango.)
Oh, Mosikoli na ngai azali malamumu, masanzoli
na Nkombo na Ye!

Sikawa elongo!

Oh, malamumu, malamumu, Yesu azali mpo na ngai,
Azali Mosungi, Mokonzi na Kimia, Nzambe na
Nguya ezali Ye;
Na bongo, abikisi ngai, abateli ngai na
masumu mpe nsoni nyonso,
Mosikoli na ngai azali malamumu, masanzoli na
Nkombo na Ye!

Oh, ndenge nalingi Yesu, (nkembo!)

Oh, ndenge nalingi . . .

Nsai mingi, nabikisami! Nazali na nsai mingi, Nazali kozila
Boyei na Ye!

Oh, ndenge nalingi Yesu,
Mpo Alingaki ngai liboso.

Sikawa, wana totomboli maboko, soko euti mpenza na
motema.

Nakotika Ye soko moke te,
Nakotika Ye soko moke te,
Nakotika Ye soko moke te,
Mpo Alingaki ngai liboso.

163 Bolingi Ye? [Losambo balobi: “Iyo.”—Mok.] Na bongo, bosengeli kolingana kati na bino. Mpamba te, soki olingaka te baoyo okoki komona ata awa, ndenge nini okoki kolinga Ye Oyo omóná te? Tópesana mbote ya loboko, tóloba:

Oh, ndenge Nalingi Yesu,
Oh, ndenge nalingi Yesu,
Oh, ndenge nalingi Yesu,
Mpo Alingaki ngai liboso.

Nakotikálá te . . .

Bótombola maboko epai na Ye sikawa. Ezali bongo.

. . . -tika Ye te,
Nakotika Ye soko moke te,
Nakotika Ye soko moke te,
Mpo Alingaki ngai liboso.

164 Bókanisa naino, Asilaki koyebisa biso emoniseli monene wana. Tolingaka Ye, boye te? Azali malamú, boye te? Tozongisi matondi mingi mpo na Nkolo na biso Yesu; atikaka biso ata moke te. “Tala, nazali na bino ntango nyonso, ata na . . .” Bozali kosepela na *Mpóso Ntuku nsambo Ya Danyele?* [Losambo elobi: “Amen.”—Mok.] Oh, tolingi Ye, boye te? Esalaka ndenge nini?

Kondima na ngai etalaka epai na Yo,
Yo Mwana-mpate ya Kalvari,
Mobikisi . . .

Bokumisa Ye kaka, uta na motema na bino.

Sikawa yoka ngai wana nazali kobondela,
Longola masumu na ngai nyonso,
O tika ete kobanda lelo
Nákóma mobimba wa Yo!

Wana nazali kotambola na nzela ya molili,
(bisó nyonso tosalaka yango.)
Mpe mawa ezingi ngai, (Iyo, Nkolo.)
Zalá bobele Mokambi na ngai; (Kokamba ngai
kati na yango, Nkolo!)

Oh sala ete molili ebóngwana pole,
Longola nsómo ya mpasi na ngai,
Kotika te ete nákende lisusu
Mosika na Yo.

[Ndeko Branham abandi koyemba na nse ya mongongo
Kondima Na Ngai Etali Likoló Epai Na Yo—Mok.]

Pesa makasi na motema na ngai oyo elembi,
Pémela mpiko na ngai;
Sálá ete molili ebongwana póle,
Longola nsómo ya mpasi na ngai,
Tika ete kobanda lelo
Nákóma mobimba wa Yo!

¹⁶⁵ E Yesu, tomoni ete tozali kopusana pene na eloko moko. Yisaya mosakoli asilaki koloba yango; Yilimia alobaki yango. Danyelee atalaki na nsima mpe amonaki makambo oyo balobaki. Ebalolaki ye motema, mpe a—atombolaki miso na Lóla. Akilaki bilei, alataki ngóto mpe mputulú. Azalaki na mposa ya koyoka, mpo ákoka kokebisa bato.

¹⁶⁶ Nkolo, biso mpe tomoni na nzela na ba-Buku, Buku na Yo, Buku ya Yisaya, Buku ya Yilimia, Buku ya Yakobo, Yoane, Luka, Máláko, Matai, Buku ya Emoniseli, ba-Buku na Yo nyonso, ete tokómi pene na nsuka. Mpe totómboli miso na biso na Lóla, na libondeli, na kolómbo, mpo tóyeba esika nini tozali kobika, Nkolo. Tobandi komona ntongo kotána. Mpe, Nkolo, toyei epai na Yo. Kondima na biso ezali kotalela Yo sikawa. Kotia pembeni mikumba nyonso, lisumu nyonso, mwa kozanga kondima nyonso oyo ekangaka biso na petee, topoti mbangu na ebiangeli ya likoló, koyebáká ete ntango na biso ezali na ndelo.

¹⁶⁷ Pámbola bato oyo bazali awa, Nkolo. Balingaka Yo. Bazali wa Yo. Basili kobima. Yo nde Opesaka emoniseli. Tobondeli ete Ópésa biso makambo oyo, wana tozali kotalela Yo.

¹⁶⁸ Pesa biso nsima ya nzánga malamu ya boyekoli, Nkolo. Pesa biso lisosoli. Zóngisa biso lisusu awa na mpokwa oyo, na mpiko ya sika. Nkolo, pakóla ngai na nsima ya nzanga oyo, oh, wana nazali koyekola, Nkolo, ntina motoba ya boyei ya Gabriele. Soki Gabriele ayaki kotala mpe apesaki ndimbola motoba wana, Nkolo, tosengeli koyeba yango. Toyekoli na nzela na ba-Buku mpe toyebi ete tokómi pene. Boye, tobóndeli ete Ómonisa biso yango na mpokwa oyo.

¹⁶⁹ Mokolo mwa Lomingo ekoya, Nkolo, E Nzambe, tia mikolo yango kuna. Nayebi te lolenge nini, kasi Okoki komema biso kino na ntango yango mpenza. Kokisa yango, Tata. Tozali kotalela Yo. Tolinganaka bamoko na bamosusu, mpe Makila na Yesu Klisto, Mwana na Nzambe, esili kopetola biso na masumu nyonso. Tozotala epai na Yo sikawa. Sunga biso wana tozali kotalela Yo, Tata, na nzela na Yesu, Nkolo na biso.



MALAKO YA GABRIELE EPAI NA DANYELE LIN61-0730M
(Gabriel's Instructions To Daniel)

MATEYA NA NTINA NA MPÓSO NTUKU NSAMBO YA DANYELE

Liteya ya Ndeko William Marrion Branham oyo, eteyamaki liboso na Anglais mokolo mwa Lomingo na ntongo, mwa 30 na sanza ya Nsambo, 1961, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org